

# 周礼

## 天官冢宰第一

惟王建国，辨方正位，体国经野，设官分职，以为民极。乃立天官冢宰，使帅其属而掌邦治，以佐王均邦国。治官之属：大宰，卿一人。小宰，中大夫二人。宰夫，下大夫四人。上士八人，中士十有六人，旅下士三十有二人。府六人，史十有二人，胥十有二人，徒百有二十人。

宫正：上士二人，中士四人，下士八人。府二人，史四人，胥四人，徒四十人。

宫伯：中士二人，下士四人。府一人，史二人，胥二人，徒二十人。

膳夫：上士二人，中士四人，下士八人。府二人，史四人，胥十有二人，徒百有二十人。

庖人：中士四人，下士八人。府二人，史四人，贾八人，胥四人，徒四十人。

内饔：中士四人，下士八人。府二人，史四人，胥十人，徒百人。

外饔：中士四人，下士八人。府二人，史四人，胥十人，徒百人。

亨人：下士四人。府一人，史二人，胥五人，徒五十人。

甸师：下士二人。府一人，史二人，胥二十人，徒三百人。

兽人：中士四人，下士八人。府二人，史四人，胥四人，徒四十人。

渔人：中士二人，下士四人。府二人，史四人，胥二十人，徒三百人。

鳖人：下士四人。府二人，史二人，徒十有六人。

腊人：下士四人。府二人，史二人，徒二十人。

医师：上士二人，下士四人。府二人，史二人，徒二十人。

食医：中士二人。

疾医：中士八人。

疡医：下士八人。

兽医：下士四人。

酒正：中士四人，下士八人。府二人，史八人，胥八人，徒八十人。

酒人：奄十人，女酒三十人，奚三百人。

浆人：奄五人，女浆十有五人，奚百有五十人。

凌人：下士二人。府二人，史二人，胥八人，徒八十人。

箴人：奄一人，女箴十人，奚二十人。

醢人：奄一人，文醢二十人，奚四十人。

醢人：奄二人，女醢二十人，奚四十人。

盐人：奄二人，女盐二十人，奚四十人。

冢人：奄一人，女冢十人，奚二十人。

宫人：中士四人，下士八人。府二人，史四人，胥八人，徒八十人。

掌舍：下士四人。府二人，史四人，徒四十人。

幕人：下士一人。府二人，史二人，徒四十人。

掌次：下士四人。府四人，史二人，徒八十人。

大府：下大夫二人，上士四人，下士八人。府四人，史八人，贾十有六人，胥八人，徒八十人。

玉府：上士二人，中士四人。府二人，史二人，工八人，贾八人，胥四人，徒四十有八

人。

内府：中士二人。府一人，史二人，徒十人。

外府：中士二人。府一人，史二人，徒十人。

司会：中大夫二人，下大夫四人，上士八人，中士十有六人。府四人，史八人，胥五人，徒五十人。

司书：上士二人，中士四人。府二人，史四人，徒八人。

职内：上士二人，中士四人。府四人，史四人，徒二十人。

职岁：上士四人，中士八人。府四人，史八人，徒二十人。

职币：上士二人，中士四人。府二人，史四人，贾四人，胥二人，徒二十人。

司裘：中士二人，下士四人。府二人，史四人，徒四十人。

掌皮：下士四人。府二人，史四人，徒四十人。

内宰：下大夫二大，上士四人，中士八人。府四人，史八人，胥八人，徒八十人。

内小臣：奄上士四人。史二人，徒八人。

阍人：王宫每门四人。圉游亦如之。

寺人：王之正内五人。

内竖：倍寺人之数。

九嫔。世妇。女御。

女祝四人，奚八人。

女史八人，奚十有六人。

典妇功：中士二人，下士四人。府一人，史四人，工四人，贾四人，徒二十人。

典丝：下士二人。府二人，史二人，贾四人，徒十有二人。

典枲：下士二人。府二人，史二人，徒二十人。

内司服：奄一人，女御二人，奚八人。

缝人：奄二人，女御八人，女工八十人，奚三十人。

染人：下士二人。府二人，史二人，徒二十人。

追师：下士二人。府一人，史二人，王二人，徒四人。

屨人：下士二人。府一人，史一人，工八人，徒四人。

夏采：下士四人。史一人，徒四人。

大宰之职：掌建邦之六典，以佐王治邦国：一曰治典，以经邦国，以治官府，以纪万民。二曰教典，以安邦国，以教官府，以扰万民。三曰礼典，以和邦国，以统百官，以谐万民。四曰政典，以平邦国，以正百官，以均万民。五曰刑典，以诘邦国，以刑百官，以纠万民。六曰事典，以富邦国，以任百官，以生万民。

以八法治官府：一曰官属，以举邦治。二曰官职，以辨邦治。三曰官联，以会官治。四曰官常，以听官治。五曰官成，以经邦治。六曰官法，以正邦治。七曰官刑，以纠邦治。八曰官计，以弊邦治。

以八则治都鄙：一曰祭祀，以驭其神。二曰法则，以驭其官。三曰废置，以驭其吏。四曰禄位，以驭其士。五曰赋贡，以驭其用。六曰礼俗，以驭其民。七曰刑赏，以驭其威。八曰田役，以驭其众。

以八柄诏王驭群臣：一曰爵，以驭其贵。二曰禄，以驭其富。三曰予，以驭其幸。四曰置，以驭其行。五曰生，以驭其福。

六曰夺，以驭其贫。七曰废，以驭其罪。八曰诛，以驭其过。

以八统诏王驭万民：一曰亲亲，二曰敬故，三曰进贤，四曰使能，五曰保庸，六曰尊贵，七曰达吏，八曰礼宾。

以九职任万民：一曰三农，生九谷。二曰园圃，毓草木。三曰虞衡，作山泽之材。四曰

藪牧，养蕃鸟兽。五曰百工，饬化八材。六曰商贾，阜通货贿。七曰嫔妇，化治丝枲。八曰臣妾，聚斂疏材。九曰闲民，无常职，转移执事。

以九赋斂财贿：一曰邦中之赋，二曰四郊之赋，三曰邦甸之赋，四曰家削之赋，五曰邦县之赋，六曰邦都之赋，七曰关市之赋，八曰山泽之赋，九曰币馀之赋。

以九式均节财用：一曰祭祀之式，二曰宾客之式，三曰丧荒之式，四曰羞服之式，五曰工事之式，六曰币帛之式，七曰刍秣之式，八曰匪颁之式，九曰好用之式。

以九贡致邦国之用：一曰祀贡，二曰嫔贡，三曰器贡，四曰币贡，五曰材贡，六曰货贡，七曰服贡，八曰游贡，九曰物贡。

以九两系邦国之民：一曰牧，以地得民。二曰长，以贵得民。三曰师，以贤得民。四曰儒，以道得民。五曰宗，以族得民。

六曰主，以利得民。七曰吏，以治得民。八曰友，以任得民。九曰藪，以富得民。

正月之吉，始和布治于邦国都鄙。乃县治象之法于象魏，使万民观治象，挟日而斂之。乃施典于邦国，而建其牧，立其监，设其参，傅其伍，陈其殷，置其辅。乃施则于都鄙，而建其长，立其两，设其伍，陈其殷，置其辅。乃施法于官府，而建其正，立其贰，设其考，陈其殷，置其辅。凡治，以典待邦国之治，以则待都鄙之治，以法待官府之治，以官成待万民之治，以礼待宾客之治。

祀五帝，则掌百官之誓戒与其具脩。前期十日，帅执事而卜日，遂戒。及执事，视涤濯。及纳亨，赞王牲事。及视之日，赞玉、币、爵之事。祀大神祇亦如之。享先王亦如之，赞玉几、玉爵。大朝觐会同，赞玉币、玉献、玉几、玉爵。大丧，赞赠玉、含玉。作大事，则戒于百官，赞王命。王视治朝，则赞听治；视四方之听朝，亦如之。凡邦之小治，则冢宰听之，待四方之宾客之小治。

岁终，则令百官府各正其治，受其会，听其致事而诏王废置。三岁，则大计群吏之治而诛赏之。

小宰之职：掌建邦之宫刑，以治王宫之政令，凡宫之纠禁。掌邦之六典、八法、八则之贰，以逆邦国、都鄙、官府之治。执邦之九贡、九赋、九式之贰，以均财节邦用。

以官府之六叙正群吏：一曰以叙正其位，二曰以叙进其治，三曰以叙作其事，四曰以叙制其食，五曰以叙受其会，六曰以叙听其情。

以官府之六属举邦治：一曰天官，其属六十，掌邦治，大事则从其长，小事则专达。二曰地官，其属六十，掌邦教，大事则从其长，小事则专达。三曰春官，其属六十，掌邦礼，大事则从其长，小事则专达。四曰夏官，其属六十，掌邦政，大事则从其长，小事则专达。五曰秋官，其属六十，掌邦刑，大事则从其长，小事则专达。六曰冬官，其属六十，掌邦事，大事则从其长，小事则专达。

以官府之六职辨邦治：一曰治职，以平邦国，以均万民，以节财用。二曰教职，以安邦国，以宁万民，以怀宾客。三曰礼职，以和邦国，以谐万民，以事鬼神。四曰政职，以服邦国，以正万民，以聚百物。五曰刑职，以诘邦国，以纠万民，以除盗贼。六曰事职，以富邦国，以养万民，以生百物。

以官府之六联合邦治：一曰祭祀之联事，二曰宾客之联事，三曰丧荒之联事，四曰军旅之联事，五曰田役之联事，六曰斂弛之联事。凡小事皆有联。

以官府之八成经邦治：一曰听政役以比居，二曰听师田以简稽，三曰听闾里以版图，四曰听称责以傅别，五曰听禄位以礼命，六曰听取予以书契，七曰听卖买以质剂，八曰听出入以要会。

以听官府之六计，弊群吏之治：一曰廉善，二曰廉能，三曰廉敬，四曰廉正，五曰廉法，六曰廉辨。

以法掌祭祀、朝觐、会同、宾客之戒具，军旅、田役、丧荒亦如之。七事者，令百官府

共其财用，治其施舍，听其治讼。

凡祭祀，赞玉币爵之事、裸将之事。凡宾客，赞裸，凡受爵之事，凡受币之事。丧荒，受其含襚币玉之事。

月终，则以官府之叙受群吏之要。赞冢宰受岁会。岁终，则令群吏致事。

正岁，帅治官之属而观治象之法，徇以木铎，曰：“不用法者，国有常刑！”乃退，以宫刑宪禁于王宫。令于百官府，曰：“各修乃职，考乃法，待乃事，以听王命。其有不共，则国有大刑！”宰夫之职：掌治朝之法，以正王及三公、六卿、大夫、群吏之位。掌其禁令。叙群吏之治，以待宾客之令、诸臣之复、万民之逆。

掌百官府之征令，辨其八职：一曰正，掌官法以治要。二曰师，掌官成以治凡。三曰司，掌官府以治目。四曰旅，掌官常以治数。五曰府，掌官契以治藏。六曰史，掌官书以赞治。七曰胥，掌官叙以治叙。八曰徒，掌官令以征令。

掌治法以考百官府、群都县鄙之治，乘其财用之出入。凡失财用、物辟名者，以官刑诏冢宰而诛之。其足用、长财、善物者，赏之。

以式法掌祭祀之戒具与其荐羞，从大宰而视涤濯。凡礼事，赞小宰比官府之具。凡朝觐、会同、宾客，以牢礼之法掌其牢礼、委积、膳献、饮食、宾赐之飧牵与其陈数。凡邦之吊事，掌其戒令，与其币器财用凡所共者。大丧、小丧，掌小官之戒令，帅执事而治之。三公、六卿之丧，与职丧帅官有司而治之。凡诸大夫之丧，使其旅帅有司而治之。

岁终，则令群吏正岁会；月终，则令正月要；旬终，则令正日成。而以考其治。治不以时举者，以告而诛之。

正岁则以法警戒群吏，令修宫中之职事。书其能者与其良者，而以告于上。

宫正：掌王宫之戒令、纠禁。以时比宫中之官府、次舍之众寡，为之版以待。夕击柝而比之。国有故，则令宿，其比亦如之。

辨外内而时禁，稽其功绪，纠其德行，凡其出入，均其稍食。去其淫怠与其奇邪之民。会其什伍而教之道艺。月终则会其稍食，岁终则会其行事。凡邦之大事，令于王宫之官府、次舍，无去守而听政令。春秋以木铎修火禁。凡邦之事辟宫中庙中，则执烛。大丧，则授庐舍，辨其亲疏贵贱之居。

宫伯：掌王宫之士庶子，凡在版者。掌其政令，行其秩叙，作其徒役之事。授八次八舍之职事。若邦有大事，作宫众，则令之。月终则均秩，岁终则均叙。以时颁其衣裳，掌其诛赏。

膳夫：掌王之饮食膳羞，以养王及后、世子。凡王之馈，食用六谷，膳用六牲，饮用六清，羞用百有二十品，珍用八物，酱用百有二十瓮。王日一举，鼎十有二，物皆有俎。以乐宥食。膳夫授祭，品尝食，王乃食。卒食，以乐彻于造。王齐日三举。大丧则不举，大荒则不举，大札则不举，天地有灾则不举，邦有大故则不举。王燕食，则奉膳赞祭。凡王祭祀、宾客食，则彻王之胾俎。凡王之稍事，设荐脯醢。王燕饮酒，则为献主。掌后及世子之膳羞。凡肉脩之颁赐皆掌之。凡祭祀之致福者，受而膳之，以挚见者亦如之。岁终则会，唯王及后、世子之膳不会。

庖人：掌共六畜、六兽、六禽，辨其名物。凡其死生鲜槁之物，以共王之膳与其荐羞之物，及后、世子之膳羞。共祭祀之好羞，共丧纪之庶羞、宾客之禽献。凡令禽献，以法授之，其出入亦如之。凡用禽献，春行羔豚膳膏香，夏行腍醢膳膏臊，秋行犍鸩膳膏腥，冬行鲜羽膳膏膻。岁终则会，唯王及后之膳禽不会。

内饔：掌王及后、世子膳羞之割烹煎和之事，辨体名肉物，辨百品味之物。王举，则陈其鼎俎，以牲体实之。选百羞、酱物、珍物以俟饔。共后及世子之膳羞。辨腥臊膻香之不可食者：牛夜鸣，则廋；羊泠毛而毳，膻；犬赤股而躁，臊；鸟麀色而沙鸣，狸；豕盲视而交睫，腥；马黑脊而般臂，騊。凡宗庙之祭祀，掌割烹之事，凡燕饮食亦如之。凡掌（共）（具）

羞、脩、刑、臠、胖、骨、鱠，以待共膳。凡王之好赐肉脩，则饗人共之。

外饗：掌外祭祀之割烹，共其脯、脩、刑、臠，陈其鼎俎，实之牲体、鱼、腊。凡宾客之飧饗、飧食之事，亦如之。邦飧耆老、孤子，则掌其割烹之事；飧士庶子，亦如之。师役，则掌共其献赐脯肉之事。凡小丧纪，陈其鼎俎而实之。

亨人：掌共鼎镬，以给水火之齐。职外、内饗之爨亨煮，辨膳羞之物。祭祀，共大羹、铏羹；宾客，亦如之。

甸师：掌帅其属而耕耨王藉，以时入之，以共粢盛。祭祀，共萧茅，共野果蓏之荐。丧事，代王受眚灾。王之同姓有罪，则死刑焉。帅其徒以薪蒸役外、内饗之事。

兽人：掌罟田兽，辨其名物。冬献狼，夏献麋，春秋献兽物。

时田，则守罟。及弊田，令禽注于虞中。凡祭祀、丧纪、宾客，共其死兽生兽。凡兽入于腊人，皮毛筋角入于玉府。凡田兽者，掌其政令。

渔人：掌以时渔为梁。春献王鲔。辨鱼物，为鲜槁，以共王膳羞。凡祭祀、宾客、丧纪，共其鱼之鲜槁。凡渔者，掌其政令。

凡渔征入于玉府。

鳖人：掌取互物。以时籍鱼、鳖、龟、蜃，凡狸物。春献鳖、蜃，秋献龟鱼。祭祀，共蜃、蠃、蜺，以授醢人。掌凡邦之籍事。

腊人：掌干肉，凡田兽之脯、腊、臠、胖之事。凡祭祀，共豆脯、荐脯、臠、胖，凡腊物。宾客、丧纪，共其脯、腊，凡干肉之事。

医师：掌医之政令，聚毒药以共医事。凡邦之有疾病者、有疮疡者造焉，则使医公而治之。岁终，则稽其医事以制其食：十全为上，十失一次之，十失二次之，十失三次之，十失四为下。

食医：掌和王之六食、六饮、六膳、百羞、百酱、八珍之齐。

凡食齐视春时，羹齐视夏时，酱齐视秋时，饮齐视冬时。凡和，春多酸，夏多苦，秋多辛，冬多咸，调以滑甘。凡会膳食之宜，牛宜稷，羊宜黍，豕宜稷，犬宜粱，雁宜麦，鱼宜苽。凡君子之食，恒放焉。

疾医：掌养万民之疾病。四时皆有疢疾，春时有瘡首疾，夏时有痒疥疾，秋时有疢寒疾，冬时有嗽、上气疾。以五味、五谷、五药养其病。以五气、五声、五色视其死生。两之以九窍之变，参之以九藏之动。凡民之有疾病者，分而治之；死终，则各书其所以而入于医师。

疡医：掌肿疡、溃疡、金疡、折疡之祝药、切、杀之齐。凡疗疡，以五毒攻之，以五气养之，以五药疗之，以五味节之。凡药，以酸养骨，以辛养筋，以咸养脉，以苦养气，以甘养肉，以滑养窍。

凡有疡者，受其药焉。

兽医：掌疗兽病，疗兽疡。凡疗兽病，灌而行之以节之，以动其气，观其所发而养之。凡疗兽疡，灌而切之，以发其恶，然后药之、养之、食之。凡兽之有病者、有疡者，使疗之；死则计其数以进退之。

酒正：掌酒之政令，以式法授酒材。凡为公酒者，亦如之。

辨五齐之名，一曰泛齐，二曰醴齐，三曰盎齐，四曰缇齐，五曰沉齐。辨三酒之物，一曰事酒，二曰昔酒，三曰清酒。辨四饮之物，一曰清，二曰医，三曰浆，四曰醕。掌其厚薄之齐，以共王之四饮、三酒之饌，及后、世子之饮与其酒。凡祭祀，以法共五齐、三酒以实八尊。大祭三贰，中祭再贰，小祭壹贰，皆有酌数。唯齐酒不贰，皆有器量。共宾客之礼酒，共后之致饮于宾客之礼一医醕糟，皆使其士奉之。凡王之燕饮酒，共其计，酒正奉之。凡飧士庶子，飧耆老、孤子，皆共其酒，无酌数。掌酒之赐颁，皆有法以行之。凡有秩酒者，以书契授之。酒正之出，日入其成，月入其要，小宰听之。岁终则会，唯王及后之饮酒不会。

以酒式诛赏。

酒人：掌为五齐三酒，祭祀则共奉之，以役世妇。共宾客之礼酒、饮酒而奉之。凡事，共酒而入于酒府。凡祭祀，共酒以往。

宾客之陈酒亦如之。

浆人：掌共王之六饮水、浆、醴、凉、医、醕，入于酒府。共宾客之稍礼。共夫人致饮于宾客之礼清醴医醕糟而奉之。凡饮共之。

凌人：掌冰（正）（政）。岁十有二月，令斩冰，三其凌。春始治鉴，凡外内饗之膳羞，鉴焉。凡酒、浆之酒醴亦如之。祭祀，共冰鉴。宾客，共冰。大丧，共夷槃冰。夏，颁冰掌事。秋，刷。

笱人：掌四笱之实。朝事之笱，其实藟、蕡、白、黑、形盐、臠、鲍鱼、鱮。馈食之笱，其实枣、栗、桃、干蓼、榛实。加笱之实，菱、芡、栗、脯，菱、芡、栗、脯。羞笱之实，糗饵、粉粢。凡祭祀，共其笱荐羞之实。丧事及宾客之事，共其荐笱羞笱。为王及后、世子共其内羞。凡笱事，掌之。

醯人：掌四豆之实。朝事之豆，其实韭菹、醯醢，昌本、麋麇，菁菹、鹿麇，茆菹、麋麇。馈食之豆，其实葵菹、羸醢，脾析、蜚醢，蜃、蜃醢，豚拍、鱼醢。加豆之实，芹菹、兔醢，深蒲、醢醢，筍菹、雁醢，菹、鱼醢。羞豆之实，醢食、糝食。凡祭祀，共荐羞之豆实，宾客、丧纪亦如之。为王及后、世子共其内羞。王举，则共醢六十瓮，以五齐、七醢、七菹、三麇实之。宾容之礼，共醢五十瓮。凡事共醢。

醢人：掌共五齐、七菹，凡醢物。以共祭犯之齐菹，凡醢酱之物。宾客，亦如之。王举，则共齐菹醢物六十瓮。共后及世子之酱齐菹。宾客之礼，共醢五十瓮。凡事共醢。

盐人：掌盐之政令，以共百事之盐。祭祀，共其苦盐、散盐。

宾客，共其形盐、散盐。王之膳羞，共饴盐；后及世子亦如之。凡齐事，煮盐以待戒令。

冢人：掌共巾冢。祭祀，以疏布巾冢八尊，以画布巾冢六彝。凡王巾皆黼。

宫人：掌王之六寝之修。为其井匱，除其不蠲，去其恶臭。

共王之沐浴。凡寝中之事，扫除、执烛、共炉炭，凡劳事。四方之舍事亦如之。

掌舍：掌王之会同之舍。设棨戟再重。设车宫，辕门。为坛墪宫，棘门。为帷宫，设旌门。无宫，则共人门。凡舍事则掌之。

幕人：掌帷、幕、幄、帘、绶之事。凡朝觐、会同、军旅、田役、祭祀，共其帷、幕、幄、帘、绶。大丧，共帷、幕、帘、绶。三公及卿大夫之丧，共其帘。

掌次：掌王次之法，以待张事。王大旅上帝，则张毡案，设皇邸。朝日，祀五帝，则张大次、小次，设重帘、重案；合诸侯，亦如之。师田，则张幕，设重帘、重案。诸侯朝、觐、会、同，则张大次、小次；师田，则张幕设案。孤卿有邦事，则张幕设案。凡丧，王则张帘三重，诸侯再重，孤卿大夫不重。凡祭祀，张其旅幕，张尸次。射，则张耦次。掌凡邦之张事。

大府：掌九贡、九赋、九功之贰，以受其货贿之入，颁其货于受藏之府，颁其贿于受用之府。凡官府都鄙之吏及执事者，受财用焉。凡颁财，以式法授之：关市之赋，以待王之膳服；邦中之赋，以待宾客；四郊之赋，以待稍秣；家削之赋，以待匪颁；邦甸之赋，以待工事；邦县之赋，以待币帛；邦都之赋，以待祭祀；山泽之赋，以待丧纪；币馀之赋，以待赐予。凡邦国之贡，以待吊用。凡万民之贡，以充府库。凡式贡之馀财，以共玩好之用。凡邦之赋用，取具焉。岁终，则以货贿之入出会之。

玉府：掌王之金玉、玩好、兵器，凡良货贿之藏。共王之服玉、佩玉、珠玉。王齐，则共食玉。大丧，共含玉、复衣裳、角枕、角柶。掌王之燕衣服、衽席、床第，凡裘器。若合诸侯，则共珠槃、玉敦。凡王之献金玉、兵器、文织、良货贿之物，受而藏之。

凡王之好赐，共其货贿。

内府：掌受九贡、九赋、九功之货贿、良兵、良器，以待邦之大用。凡四方之币献之金

玉、齿革、兵器，凡良货贿，入焉。凡适四方使者，共其所受之物而奉之。凡王及冢宰之好赐予，则共之。

外府：掌邦布之入出，以共百物而待邦之用，凡有法者。共王及后、世子之衣服之用。凡祭祀、宾客、丧纪、会同、军旅，共其财用之币帛、赐予之财用。凡邦之小用，皆受焉。岁终则会，唯王及后之服不会。

司会：掌邦之六典、八法、八则之贰，以逆邦国、都鄙、官府之治。以九贡之法致邦国之财用，以九赋之法令田野之财用，以九功之法令民职之财用，以九式之法均节邦之财用。掌国之官府、郊野、县都之百物财用凡在书契版图者之贰，以逆群吏之治而听其会计。以参互考日成，以月要考月成，以岁会考岁成。以周知四国之治，以诏王及冢宰废置。

司书：掌邦之六典、八法、八则、九职、九正、九事，邦中之版，土地之图，以周知入出百物，以叙其财；受其币，使入于职币。凡上之用财（用），必考于司会。三岁，则大计群吏之治，以知民之财（用）器械之数，以知田野、夫家、六畜之数，以知山林川泽之数，以逆群吏之征令。凡税斂，掌事者受法焉。及事成，则入要贰焉。凡邦治，考焉。

职内：掌邦之赋入，辨其财用之物而执其总，以贰官府都鄙之财入之数，以逆邦国之赋用。凡受财者，受其贰令而书之。

及会，以逆职岁与官府财用之出，而叙其财以待邦之移用。

职岁：掌邦之赋出，以贰官府都鄙之财出赐之数，以待会计而考之。凡官府都鄙群吏之出财用，受式法于职岁。凡上之赐予，以叙与职币授之。及会，以式法赞逆会。

职币：掌式法以斂官府都鄙与凡用邦财者之币，振掌事者之余财。皆辨其物而奠其录，以书牒之，以诏上之小用、赐予。

岁终则会其出。凡邦之会事，以式法赞之。

司裘：掌为大裘，以共王祀天之服。中秋献良裘，王乃行羽物。季秋献功裘，以待颁赐。王大射，则共虎侯、熊侯、豹侯，设其鹄；诸侯则共熊侯、豹侯，卿大夫则共麋侯，皆设其鹄。大丧，廞裘，饰皮车。凡邦之皮事，掌之。岁终则会，唯王之裘与其皮事不会。

掌皮：掌秋斂皮，冬斂革，春献之。遂以式法颁皮革于百工，共其毳毛为毡，以特邦事。岁终则会其财贄。

内宰：掌书版图之法以治王内之政令，均其稍食，分其人民以居之。以阴礼教六宫，以阴礼教九嫔。以妇职之法教九御，使各有属，以作二事；正其服，禁其奇邪，展其功绪。大祭祀，后裸献，则赞；瑶爵亦如之。正后之服位，而诏其礼乐之仪。赞九嫔之礼事。凡宾客之裸献、瑶爵，皆赞。致后之宾客之礼。凡丧事，佐后，使治外内命妇，正其服位。凡建国，佐后立市，设其次，置其叙，正其肆，陈其货贿，出其度量淳制，祭之以阴礼。中春，诏后帅外内命妇始蚕于北郊，以为祭服。岁终，则会内人之稍食，稽其功事。佐后而受献功者，比其小大与其粗良而赏罚之。会内宫之财用。正岁均其稍食，稽其功事，宪禁令于王之北宫而纠其守。上春，诏王后帅六宫之人而生稯稊之种，而献之于王。

内小臣：掌王后之命，正其服位。后出入，则前驱。若有祭祀、宾客、丧纪，则摈，诏后之礼事，相九嫔之礼事，正内人之礼事，彻后之俎。后有好事于四方，则使往；有好令于卿大夫，则亦如之。掌王之阴事阴令。

阍人：掌守王宫之中门之禁。丧服、凶器不入宫，潜服、贼器不入宫，奇服、怪民不入宫。凡内人、公器、宾客，无帅则幾其出入。以时启闭。凡外内命夫命妇出入，则为之辟。掌扫门庭。

大祭祀、丧纪之事，设门燎，辟宫门庙门。凡宾客，亦如之。

寺人：掌王之内人及女宫之戒令，相道其出入之事而纠之。若有丧纪、宾客、祭祀之事，则帅女宫而致于有司，佐世妇治礼事。掌内人之禁令，凡内人吊临于外，则帅而往，立于其前面诏相之。

内竖：掌内外之通令，凡小事。若有祭祀、宾客、丧纪之事，则为内人辟。王后之丧，迁于宫中，则前辟；及葬，执衾器以从遣车。

九嫔：掌妇学之法以教九御妇德、妇言、妇容、妇功，各帅其属而以时御叙于王所。凡祭祀，赞玉粢，赞后荐、彻豆筯。若有宾客，则从后。大丧，帅叙哭者亦如之。

世妇：掌祭祀、宾客、丧纪之事，帅女宫而濯概，为粢盛。及祭之日，莅陈女宫之具，凡内羞之物。掌吊临于卿大夫之丧。

女御：掌御叙于王之燕寝。以岁时献功事。凡祭祀，赞世妇。大丧，掌沐浴。后之丧，持鬋。从世妇而吊于卿大夫之丧。

女祝：掌王后之内祭祀，凡内祷祠之事。掌以时招、梗、祴、禳之事，以除疾殃。

女史：掌王后之礼职，掌内治之贰，以诏后治内政。逆内宫。书内令。凡后之事以礼从。

典妇功：掌妇式之法，以授嫔妇及内人女功之事。凡授嫔妇功，及秋献功，辨其苦良、比其小大而贾之，物书而赧之。

以共王及后之用，颁之于内府。

典丝：掌丝入而辨其物，以其贾赧之。掌其藏与其出，以待兴功之时。颁丝于外内工，皆以物授之。凡上之赐予，亦如之。

及献功，则受良功而藏之，辨其物而书其数，以待有司之政令、上之赐予。凡祭祀，共黼画组就之物。丧纪，共其丝纁组文之物。凡饰邦器者，受文织丝组焉。岁终，则各以其物会之。

典枲：掌布总缕纁之麻草之物，以待时颁功而授赧。及献功，受苦功，以其贾赧而藏之，以待时颁。颁衣服，授之，赐予亦如之。岁终，则各以其物会之。

内司服：掌王后之六服一祴衣、揄狄、阙狄、鞠衣、展衣、缘衣、素沙。辨外内命妇之服一鞠衣、展衣、缘衣、素沙。凡祭祀、宾客，共后之衣服；及九嫔、世妇凡命妇，共其衣服；共丧衰亦如之。后之丧，共其衣服，凡内具之物。

缝人：掌王宫之缝线之事，以役女御，以缝王及后之衣服。

丧，缝棺饰焉，衣衾柳之材。掌凡内之缝事。

染人：掌染丝帛。凡染，春暴练，夏纁玄，秋染夏，冬献功。

掌凡染事。

追师：掌王后之首服，为副、编、次，追衡、笄，为九嫔及外内命妇之首服，以待祭祀、宾客。丧纪，共笄经亦如之。

屨人：掌王及后之服屨，为赤舄、黑舄，赤纁、黄纁，青句、素屨，葛屨。辨外内命夫命妇之命屨、功屨、散屨。凡四时之祭祀，以宜服之。

夏采：掌大丧以冕服复于大祖，以乘车建纁复于四郊。

## 地官司徒第二

惟王建国，辨方正位，体国经野，设官分职，以为民极。乃立地官司徒，使帅其属而掌邦教，以佐王安抚邦国。教官之属：大司徒，卿一人。小司徒，中大夫二人。乡师，下大夫四人。

上士八人，中士十有六人，旅下士三十有二人。府六人，史十有二人，胥十有二人，徒百有二十人。

乡老，二乡则公一人。乡大夫，每乡卿一人。州长，每州中大夫一人。党正，每党下大夫一人。族师，每族上士一人。闾胥，每闾中士一人。比长，五家下士一人。

封人：中士四人，下士八人。府二人，史四人，胥六人，徒六十人。

鼓人：中士六人。府二人，史二人，徒二十人。

舞师：下士二人。胥四人，舞徒四十人。



牧人：下士六人。府一人，史二人，徒六十人。

牛人：中士二人，下士四人。府二人，史四人，胥二十人，徒二百人。

充人：下士二人。史二人，胥四人，徒四十人。

载师：上士二人，中士四人。府二人，史四人，胥六人，徒六十人。

阍师：中士二人。史二人，徒二十人。

县师：上士二人，中士四人。府二人，史四人，胥八人，徒八十人。

遗人：中士二人，下士四人。府二人，史四人，胥四人，徒四十人。

均人：中士二人，下士四人。府二人，史四人，胥四人，徒四十人。

师氏：中大夫一人，上士二人。府二人，史二人，胥十有二人，徒百有二十人。

保氏：下大夫一人，中士二人。府二人，史二人，胥六人，徒六十人。

司谏：中士二人。史二人，徒二十人。

司救：中士二人。史二人，徒二十人。

调人：下士二人。史二人，徒十人。

媒氏：下士二人。史二人，徒十人。

司市：下大夫二人，上士四人，中士八人，下士十有六人。

府四人，史八人，胥十有二人，徒百有二十人。

质人：中士二人，下士四人。府二人，史四人，胥二人，徒二十人。

廛人：中士二人，下士四人。府二人，史四人，胥二人，徒二十人。

胥师，二十肆则一人，皆二史。贾师，二十肆则一人，皆二史。司鹵，十肆则一人。司稽，五肆则一人。胥，二肆则一人。

肆长，每肆则一人。

泉府：上士四人，中士八人，下士十有六人。府四人，史八人，贾八人，徒八十人。

司门：下大夫二人，上士四人，中士八人。（下士十有六人。）府二人，史四人，胥四人，徒四十人。每门下士二人，府一人，史二人，徒四人。

司关：上士二人，中士四人。府二人，史四人，胥八人，徒八十人，每关下士二人，府一人，史二人，徒四人。

掌节：上士二人，中士四人。府二人，史四人，胥二人，徒二十人。

遂人：中大夫二人。遂师：下大夫四人，上士八人，中士十有六人，旅下士三十有二人。府四人，史十有二人，胥十有二人，徒百有二十人。

遂大夫，每遂中大夫一人。县正，每县下大夫一人。鄙师，每鄙上士一人。鄯长，每鄯中士一人。里宰，每里下士一人。邻长，五家则一人。

旅师：中士四人，下士八人。府二人，史四人，胥八人，徒八十人。

稍人：下士四人。史二人，徒十有二人。

委人：中士二人，下士四人。府二人，史四人，徒四十人。

土均：上士二人，中士四人，下士八人。府二人，史四人，胥四人，徒四十人。

草人：下士四人。史二人，徒十有二人。

稻人：上士二人，中士四人，下士八人。府二人，史四人，胥十人，徒百人。

土训：中士二人，下士四人。史二人，徒八人。

诵训：中士二人，下士四人。史二人，徒八人。

山虞：每大山中士四人，下士八人；府二人，史四人，胥八人，徒八十人。中山，下士六人；史二人，胥六人，徒六十人。小山，下士二人；史一人，徒二十人。

林衡：每大林麓下士十有二人；史四人，胥十有二人，徒百有二十人。中林麓，如中山之虞。小林麓，如小山之虞。

川衡：每大川下士十有二人；史四人，胥十有二人，徒百有二十人。中川，下士六人；史二人，胥六人，徒六十人。小川，下士二人；史一人，徒二十人。

泽虞：每大泽大藪中士四人，下士八人；府二人，史四人，胥八人，徒八十人。中泽中藪，如中川之衡。小泽小藪，如小川之衡。

迹人：中士四人，下士八人。史二人，徒四十人。

矿人：中士二人，下士四人。府二人，史二人，胥四人，徒四十人。

角人：下士二人。府一人，徒八人。

羽人：下士二人。府一人，徒八人。

掌葛：下士二人。府一人，史一人，胥二人，徒二十人。

掌染草：下士二人。府一人，史二人，徒八人。

掌炭：下士二人。史二人，徒二十人。

掌茶：下士二人。府一人，史一人，徒二十人。

掌蜃：下士二人。府一人，史一人，徒八人。

圉人：中士四人，下士八人。府二人，胥八人，徒八十人。

场人：每场下士二人。府一人，史一人，徒二十人。

廩人：下大夫二人，上士四人，中士八人，下士十有六人。

府八人，史十有六人，胥三十人，徒三百人。

舍人：上士二人，中士四人。府二人，史四人，胥四人，徒四十人。

仓人：中士四人，下士八人。府二人，史四人，胥四人，徒四十人。

司禄：中士四人，下士八人。府二人，史四人，徒四十人。

司稼：下士八人。史四人，徒四十人。

春人：奄二人，女春詵二人，奚五人。

饔人：奄二人，女饔八人，奚四十人。

稟人：奄八人，女稟每奄二人，奚五人。

大司徒之职：掌建邦之土地之图与其人民之数，以佐王安抚邦国。

以天下土地之图，周知九州之地域广轮之数，辨其山林、川泽、丘陵、坟衍、原隰之名物；而辨其邦国都鄙之数，制其畿疆而沟封之，设其社稷之壝而树之田主。各以其野之所宜木，遂以名其社与其野。

以土会之法辨五地之物生：一曰山林，其动物宜毛物，其植物宜阜物，其民毛而方。二曰川泽，其动物宜鳞物，其植物宜膏物，其民黑而津。三曰丘陵，其动物宜羽物，其植物宜核物，其民专而长。四曰坟衍，其动物宜介物，其植物宜莢物，其民皙而瘠。五曰原隰，其动物宜裸物，其植物宜丛物，其民丰肉而庠。

因此五物者民之常，而施十有二教焉：一曰以祀礼教敬，则民不苟。二曰以阳礼教让，则民不争。三曰以阴礼教亲，则民不怨。四曰以乐（礼）教和，则民不乖。五曰以仪辨等，则民不越。六曰以俗教安，则民不偷。七曰以刑教中，则民不讎。八曰以誓教恤，则民不怠。九曰以度教节，则民知足。十曰以世事教能，则民不失职。十有一曰以贤制爵，则民慎德。十有二曰以庸制禄，则民兴功。

以土宜之法辨十有二土之名物，以相民宅而知其利害，以阜人民，以蕃鸟兽，以毓草木，以任土事。辨十有二壤之物而知其种，以教稼穡树蓫。

以土均之法辨五物九等，制天下之地征，以作民职，以令地贡，以敛财赋，以均齐天下之政。

以土圭之法测土深、正日景，以求地中。日南则景短多暑，日北则景长多寒，日东则景夕多风，日西则景朝多阴。日至之景尺有五寸，谓之地中：天地之所合也，四时之所交也，风雨之所会也，阴阳之所和也。然则百物阜安，乃建王国焉，制其畿方千里而封树之。

凡建邦国，以土圭土其地而制其域：诸公之地，封疆方五百里，其食者半；诸侯之地，封疆方四百里，其食者参之一；诸伯之地，封疆方三百里，其食者参之一；诸子之地，封疆方二百里，其食者四之一；诸男之地，封疆方百里，其食者四之一。

凡造都鄙，制其地域而封沟之。以其室数制之：不易之地家百亩，一易之地家二百亩，再易之地家三百亩。乃分地职、奠地守、制地贡而颁职事焉，以为地法而待政令。

以荒政十有二聚万民：一曰散利，二曰薄征，三曰缓刑，四曰弛力，五曰舍禁，六曰去箠，七曰眚礼，八曰杀哀，九曰蕃乐，十曰多昏，十有一曰索鬼神，十有二曰除盗贼。

以保息六养万民：一曰慈功，二曰养老，三曰振穷，四曰恤贫，五曰宽疾，六曰安富。

以本俗六安万民：一曰媿宫室，二曰族坟墓，三曰联兄弟，四曰联师儒，五曰联朋友，六曰同衣服。

正月之吉，始和布教于邦国都鄙。乃县教象之法于象魏，使万民观教象，挟日而敛之。乃施教法于邦国都鄙，使之各以教其所治民。令五家为比，使之相保；五比为闾，使之相受；四闾为族，使之相葬；五族为党，使之相救；五党为州，使之相赙；五州为乡，使之相宾。

颁职事十有二于邦国都鄙，使以登万民：一曰稼穡，二曰树蓺，三曰作材，四曰阜蕃，五曰飭材，六曰通财，七曰化材，八曰斂材，九曰生材，十曰学艺，十有一曰世事，十有二曰服事。

以乡三物教万民而宾兴之：一曰六德，知、仁、圣、义、忠、和；二曰六行，孝、友、睦、姻、任、恤；三曰六艺，礼、乐、射、御、书、数。

以乡八刑纠万民：一曰不孝之刑，二曰不睦之刑，三曰不姻之刑，四曰不弟之刑，五曰不任之刑，六曰不恤之刑，七曰造言之刑，八曰乱民之刑。

以五礼防万民之伪，而教之中。以六乐防万民之情，而教之和。

凡万民之不服教而有狱讼者，与有地治者听而断之；其附于刑者归于士。

祀五帝，奉牛牲，羞其肆。享先王，亦如之。大宾客，令野修道委积。大丧，帅六乡之众庶属其六引，而治其政令。大军旅，大田役，以旗致万民，而治其徒庶之政令。若国有大故，则致万民于王门，令无节者不行于天下。大荒、大札，则令邦国移民通财、舍禁弛力、薄征缓刑。

岁终，则令教官正治而致事。正岁令于教官曰：“各共尔职，修乃事，以听王命。其有不正，则国有常刑！”小司徒之职：掌建邦之教法，以稽国中及四郊、都鄙之夫家、九比之数，以辨其贵贱、老幼、废疾，凡征役之施舍与其祭祀、饮食、丧纪之禁令。

乃颁比法于六乡之大夫，使各登其乡之众寡、六畜、车辇，辨其物，以岁时入其数，以施政教，行征令。及三年，则大比；大比则受邦国之比要。

乃会万民之卒伍而用之：五人为伍，五伍为两，四两为卒，五卒为旅，五旅为师，五师为军，以起军旅，以作田役，以比追胥，以令贡赋。

乃均土地以稽其人民而周知其数：上地家七人，可任也者家三人；中地家六人，可任也者二家五人；下地家五人，可任也者家二人。

凡起徒役，毋过家一人，以其馀为羨；唯田与追胥竭作。

凡用众庶，则掌其政教与其戒禁，听其辞讼，施其赏罚，诛其犯命者。

凡国之大事，致民；大故，致馀子。

乃经土地而井牧其田野：九夫为井，四井为邑，四邑为丘，四丘为甸，四甸为县，四县为都，以任地事而令贡赋，凡税斂之事。乃分地域而辨其守，施其职而平其政。

凡小祭祀，奉牛牲，羞其肆。小宾客，令野修道委积。大军旅，帅其众庶。小军旅，巡役，治其政令。大丧，帅邦役，治其政教。

凡建邦国，立其社稷，正其畿疆之封。

凡民讼，以地比正之；地讼，以图正之。

岁终，则考其属官之治成而诛赏，令群吏正要会而致事。

正岁则帅其属而观教法之象，徇以木铎，曰：“不用法者，国有常刑！”令群吏宪禁令，修法纠职以待邦治。及大比六乡四郊之吏，平教治，正政事，考夫屋及其众寡、六畜、兵器，以待政令。

乡师之职：各掌其所治乡之教而听其治。以国比之法，以时稽其夫家众寡，辨其老幼、贵贱、废疾、牛马之物，辨其可任者与其施舍者，掌其戒令纠禁，听其狱讼。

大役，则帅民徒而至，治其政令；既役，则受州里之役要，以考司空之辟，以逆其役事。凡邦事，令作秩叙。大祭祀，羞牛牲，共茅菹。大军旅、会同，正治其徒役与其輶輶，戮其犯命者。

大丧用役，则帅其民而至，遂治之。及葬，执（纛）（翻），以与匠师御柩而治役。及窆，执斧以涖匠师。

凡四时之田：前期，出田法于州里，简其鼓铎、旗物、兵器，修其卒伍。及期，以司徒之大旗致众庶，而陈之以旗物；辨乡邑，而治其政令刑禁；巡其前后之屯，而戮其犯命者；断其争禽之讼。

凡四时之征令有常者，以木铎徇于市朝。以岁时巡国及野，而赉万民之艰阨，以王命施惠。岁终，则考六乡之治以诏废置。正岁稽其乡器，比共吉凶二服，闾共祭器，族共丧器，党共射器，州共宾器，乡共吉凶礼乐之器。若国大比，则考教察辞，稽器展事，以诏诛赏。

乡大夫之职：各掌其乡之政教禁令。

正月之吉，受教法于司徒，退而颁之于其乡吏，使各以教其所治，以考其德行，察其道艺。

以岁时登其夫家之众寡，辨其可任者。国中自七尺以及六十，野自六尺以及六十有五，皆征之。其舍者，国中贵者、贤者、能者、服公事者、老者、疾者，皆舍。以岁时入其书。三年则大比，考其德行、道艺，而兴贤者，能者。乡老及乡大夫帅其吏与其众寡，以礼礼宾之。厥明，乡老及乡大夫、群吏献贤能之书于王，王再拜受之，登于天府，内史贰之。退而以乡射之礼五物询众庶，一曰和，二曰容，三曰主皮，四曰和容，五曰兴舞。此谓使民兴贤，出使长之；使民兴能，入使治之。

岁终，则令六乡之吏皆会政致事。正岁令群吏考法于司徒，以退，各宪之于其所治（之）。国大询于众庶，则各帅其乡之众寡而致于朝。国有大故，则令民各守其闾以待政令。以旌节辅令，则达之。

州长：各掌其州之教治政令之法。正月之吉，各属其州之民而读法，以考其德行道艺而劝之，以纠其过恶而戒之。若以岁时祭祀州社，则属其民而读法，亦如之。春秋以礼会民而射于州序。凡州之大祭祀、大丧，皆莅其事。若国作民而师、田、行、役之事，则帅而致之；掌其戒令与其赏罚。岁终，则会其州之政令。正岁则读教法如初。三年大比，则大考州里，以赞乡大夫废兴。

党正：各掌其党之政令教治。及四时之孟月吉日，则属民而读邦法以纠戒之。春秋祭礿，亦如之。国索鬼神而祭祀，则以礼属民，而饮酒于序以正齿位：壹命齿于乡里，再命齿于父族，三命而不齿。凡其党之祭祀、丧纪、昏冠、饮酒，教其礼事，掌其戒禁。凡作民而师、田、行、役，则以其法治其政事。岁终，则会其党政，帅其吏而致事。正岁属民读法，而书其德行道艺。

以岁时莅校比。及大比，亦如之。

族师：各掌其族之戒令政事。月吉，则属民而读邦法，书其孝、弟、睦、姻、有学者。春秋祭酺亦如之。以邦比之法，帅四闾之吏，以时属民而校，登其族之夫家众寡，辨其贵贱、老幼、废疾、可任者，及其六畜、车輶。五家为比，十家为联；五人为伍，十人为联；四闾为族，八闾为联；使之相保相受，刑罚庆赏相及相共，以受邦职，以役国事，以相葬埋。若

作民而师、田、行、役，则合其卒伍，简其兵器，以鼓铎、旗物帅而至，掌其治令、戒禁、刑罚。岁终，则会政致事。

闾胥：各掌其闾之征令。以岁时各数其闾之众寡，辨其施舍。凡春秋之祭祀、役政、丧纪之（数）（事），聚众庶。既比，则读法，书其敬、敏、任、恤者。凡事，掌其比、觇挞罚之事。

比长：各掌其比之治。五家相受，相和亲；有罪奇邪，则相及。徙于国中及郊，则从而授之。若徙于他，则为之旌节而行之。若无授无节，则唯圉土内之。

封人：掌设王之社壝，为畿封而树之。凡封国，设其社稷之壝，封其四疆。造都邑之封域者亦如之。令社稷之职。凡祭祀，饰其牛牲，设其楅衡，置其紉，共其水稿。歌舞牲，及毛炮之豚。

凡丧纪、宾客、军旅、大盟，则饰其牛牲。

鼓人：掌教六鼓、四金之音声，以节声乐，以和军旅，以正田役。教为鼓，而辨其声用：以雷鼓鼓神祀，以灵鼓鼓社祭，以路鼓鼓鬼享，以鼗鼓鼓军事，以鞀鼓鼓役事，以晋鼓鼓金奏，以金鐃和鼓，以金镯节鼓，以金铎止鼓，以金铎通鼓。凡祭祀百物之神，鼓兵舞帔舞者。凡军旅，夜鼓鼗，军动则鼓其众，田役亦如之。救日月，则诏王鼓。大丧，则诏大仆鼓。

舞师：掌教兵舞，帅而舞山川之祭祀；教帔舞，帅而舞社稷之祭祀；教羽舞，帅而舞四方之祭祀；教皇舞，帅而舞旱暵之事。凡野舞，则皆教之。凡小祭祀，则不兴舞。

牧人：掌牧六牲而阜蕃其物，以共祭祀之牲牷。凡阳祀，用騂牲毛之；阴祀，用黝牲毛之；望祀，各以其方之色牲毛之。凡时祀之牲，必用牲物。凡外祭毁事，用絜可也。凡祭祀，共其牺牲，以授充人系之。凡牲不系者，共奉之。

牛人：掌养国之公牛，以待国之政令。凡祭祀，共其享牛、求牛，以授职人而刍之。凡宾客之事，共其牢礼积膳之牛；飧食、宾射，共其膳羞之牛；军事，共其犒牛；丧事，共其奠牛。凡会同、军旅、行役，共其兵车之牛与其牵徭，以载公任器。凡祭祀，共其牛牲之互与其盆簠以待事。

充人：掌系祭祀之牲牷。祀五帝，则系于牢，刍之三月。享先王亦如之。凡散祭祀之牲，系于国门，使养之。展牲则告牷。

硕牲则赞。

载师：掌任土之法以物地事、授地职，而待其政令。以廛里任国中之地，以场圃任园地，以宅田、士田、贾田任近郊之地，以官田、牛田、赏田、牧田任远郊之地，以公邑之田任甸地，以家邑之田任稍地，以小都之田任县地，以大都之田任疆地。凡任地，国宅无征，园廛二十而一，近郊十一，远郊二十而三，甸、稍、县、都皆无过十二，唯其漆林之征二十而五。凡宅不毛者，有里布。凡田不耕者，出屋粟。凡民无职事者，出夫家之征。以时征其赋。

闾师：掌国中及四郊之人民、六畜之数，以任其力，以待其政令，以时征其赋。凡任民：任农以耕事，贡九谷；任圃以树事，贡草木；任工以飭材事，贡器物；任商以市事，贡货贿；任牧以畜事，贡鸟兽；任嫔以女事，贡布帛；任衡以山事，贡其物；任虞以泽事，贡其物。凡无职者出夫布。凡庶民不畜者祭无牲，不耕者祭无盛，不树者无棹，不蚕者不帛，不绩者不衰。

县师：掌邦国、都鄙、稍甸、郊里之地域，而辨其夫家、人民、田莱之数，及其六畜、车辇之稽。三年大比，则以考群吏，而以诏废置。若将有军旅、会同、田役之戒，则受法于司马，以作其众庶及马牛车辇，会其车人之卒伍，使皆备旗鼓兵器，以帅而至。凡造都邑，量其地，辨其物，而制其域。以岁时征野之赋贡。

遗人：掌邦之委积，以待施惠。乡里之委积，以恤民之艰阨；门关之委积，以养老孤；郊里之委积，以待宾客；野鄙之委积，以待羁旅；县都之委积，以待凶荒。凡宾客、会同、师役，掌其道路之委积。凡国野之道：十里有庐，庐有饮食；三十里有宿，宿有路室，路室

有委；五十里有市，市有候馆，候馆有积。凡委积之事，巡而比之，以时颁之。

均人：掌均地政，均地守，均地职，均人民、牛马、车辇之力政。凡均力政，以岁上下：丰年则公旬用三日焉，中年则公旬用二日焉，无年则公旬用一日焉。凶札则无力政，无财赋，不收地守、地职，不均地政。三年大比，则大均。

师氏：掌以嫒诏王。以三德教国子：一曰至德，以为道本；二曰敏德，以为行本；三曰孝德，以知逆恶。教三行：一曰孝行，以亲父母；二曰友行，以尊贤良；三曰顺行，以事师长。居虎门之左，司王朝。掌国中失之事，以教国子弟，凡国之贵游子弟学焉。凡祭祀、宾客、会同、丧纪、军旅，王举则从；听治亦如之。使其属帅四夷之隶，各以其兵服守王之门外，且蹕。朝在野外，则守内列。

保氏：掌谏王恶，而养国子以道。乃教之六艺：一曰五礼，二曰六乐，三曰五射，四曰五驭，五曰六书，六曰九数。乃教之六仪：一曰祭祀之容，二曰宾客之容，三曰朝廷之容，四曰丧纪之容，五曰军旅之容，六曰车马之容。凡祭祀、宾客、会同、丧纪、军旅，王举则从；听治亦如之。使其属守王闾。

司谏：掌纠万民之德而劝之朋友，正其行而强之道艺，巡问而观察之，以时书其德行道艺，辨其能而可任于国事者；以考乡里之治，以诏废置，以行赦宥。

司救：掌万民之邪恶过失而诛让之，以礼防禁而救之。凡民之有邪恶者，三让而罚，三罚而士加明刑，耻诸嘉石，役诸司空。其有过失者，三让而罚，三罚而归于圜土。凡岁时有天患民病，则以节巡国中及郊野，而以王命施惠。

调人：掌司万民之难而谐和之。凡过而杀伤人者，以民成之。鸟兽，亦如之。凡和难：父之仇，辟诸海外；兄弟之仇，辟诸千里之外；从父兄弟之仇，不同国；君之仇视父，师长之仇视兄弟，主友之仇视从父兄弟。弗辟，则与之瑞节而以执之。凡杀人有反杀者，使邦国交仇之。凡杀人而义者，不同国，令勿仇，仇之则死。凡有斗怒者成之，不可成者则书之，先动者诛之。

媒氏：掌万民之判。凡男女自成名以上，皆书年月日名焉。

令男三十而娶，女二十而嫁。凡娶判妻入子者，皆书之。中春之月，令会男女。于是时也，奔者不禁。若无故而不用令者，罚之。司男女之无夫家者而会之。凡嫁子娶妻，入币纯帛无过五两。禁迁葬者与嫁殇者。凡男女之阴讼，听之于胜国之社；其附于刑者，归之于士。

司市：掌市之治教、政刑、量度、禁令。以次叙分地而经市，以陈肆辨物而平市，以政令禁物靡而均市，以商贾阜货而行布，以量度成贾而征价，以质剂结信而止讼，以贾民禁伪而除诈，以刑罚禁黻而去盗，以泉府同货而敛賒。大市日而市，百族为主；朝市朝时而市，商贾为主；夕市夕时而市，贩夫贩妇为主。凡市入，则胥执鞭度守门，市之群吏平肆、展成奠贾，上旌于思次以令市。市师莅焉，而听大治大讼。胥师、贾师莅于介次，而听小治小讼。凡万民之期于市者，辟布者、量度者、刑戮者各于其地之叙。凡得货贿、六畜者亦如之，三日而举之。凡治市之货贿、六畜、珍异，亡者使有，利者使阜，害者使亡，靡者使微。凡通货贿，以玺节出入之。国凶、荒、札、丧，则市无征而作布。凡市伪饰之禁，在民者十有二，在商者十有二，在贾者十有二，在工者十有二。市刑：小刑宪罚，中刑徇罚，大刑扑罚，其附于刑者归于士。国君过市，则刑人赦；夫人过市，罚一幕；世子过市，罚一帑；命夫过市，罚一盖；命妇过市，罚一帷。凡会同、师役，市司帅贾师而从，治其市政，掌其卖价之事。

质人：掌成市之货贿，人民、牛马、兵器、珍异。凡卖价者质剂焉，大市以质，小市以剂。掌稽市之书契，同其度量，壹其淳制，巡而考之，犯禁者举而罚之。凡治质剂者，国中一旬，郊二旬，野三旬，都三月，邦国期；期内听，期外不听。

廛人：掌敛市（之）歛布、总布、质布、罚布、廛布而入于泉府。凡屠者，敛其皮角筋骨，入于五府。凡珍异之有滞者，敛而入于膳府。

胥师：各掌其次之政令，而平其货贿，宪刑禁焉。察其诈伪、饰行、僨愿者而诛罚之。

听其小治小讼而断之。

贾师：各掌其次之货贿之治，辨其物而均平之，展其成而奠其贾，然后令市。凡天患，禁贵儻者，使有恒贾。四时之珍异，亦如之。凡国之卖儻，各帅其属而嗣掌其月。凡师役、会同，亦如之。

司黻：掌宪市之禁令，禁其斗器者与其黻乱者、出入相陵犯者、以属游饮食于市者。若不可禁，则搏而戮之。

司稽：掌巡市，而察其犯禁者与其不物者而搏之。掌执市之盗贼以徇，且刑之。

胥：各掌其所治之政，执鞭度而巡其前。掌其坐作出入之禁令，袭其不正者。凡有罪者，挾戮而罚之。

肆长：各掌其肆之政令。陈其货贿，名相近者相远也，实相近者相尔也，而平正之。敛其总布，掌其戒禁。

泉府：掌以市之征布，敛市之不售货之滞于民用者，以其贾买之，物赍而书之，以待不时而买者。买者各从其抵，都鄙从其主，国人、郊人从其有司，然后予之。凡赊者，祭祀无过旬日，丧纪无过三月。凡民之贷者，与其有司辨而授之，以国服为之息。凡国事之财用，取具焉。岁终，则会其出入而纳其馀。

司门：掌授管键，以启闭国门。凡出入不物者，正其货贿。

凡财物犯禁者举之，以其财养死政之老与其孤。祭祀之牛牲系焉，监门养之。凡岁时之门，受其馀。凡四方之宾客造焉，则以告。

司关：掌国货之节，以联门市。司货贿之出入者，掌其治禁与其征廛。凡货不出于关者，举其货，罚其人。凡所达货贿者，则以节传出之。国凶札，则无关门之征，犹幾。凡四方之宾客叩关，则为之告。有外内之送令，则以节传出内之。

掌节：掌守邦节而辨其用，以辅王命。守邦国者用玉节，守都鄙者用角节。凡邦国之使节，山国用虎节，土国用人节，泽国用龙节：皆金也，以英荡辅之。门关用符节，货贿用玺节，道路用旌节，皆有期以反节。凡通达于天下者，必有节，以传辅之。

无节者，有幾则不达。

遂人：掌邦之野。以土地之图经田野，造县鄙形体之法。五家为邻，五邻为里，四里为鄞，五鄞为鄙，五鄙为县，五县为遂，皆有地域，沟树之。使各掌其政令刑禁，以岁时稽其人民，而授之田野。简其兵器，教之稼穡。凡治野：以下剂致甿，以田里安甿，以乐昏扰甿，以土宜教甿稼穡，以兴勑利甿，以时器劝甿，以疆予任甿，以土均平政。辨其野之土一上地、中地、下地，以颁田里：上地，夫一廛，田百亩，莱五十亩，馀夫亦如之；中地，夫一廛，田百亩，莱百亩，馀夫亦如之；下地，夫一廛，田百亩，莱二百亩，馀夫亦如之。凡治野：夫间有遂，遂上有径；十夫有沟，沟上有畛；百夫有洫，洫上有涂；千夫有浍，浍上有道；万夫有川，川上有路，以达于畿。以岁时登其夫家之众寡及其六畜、车犂，辨其老幼、废疾与其施舍者，以颁职作事，以令贡赋，以令师田，以起政役。若起野役，则令各帅其所治之民而至，以遂之大旗致之，其不用命者诛之。凡国祭祀，共野牲，令野职。

凡宾客，令修野道而委积。大丧，帅六遂之役而致之，掌其政令；及葬，帅而属六綽；及窆，陈役。凡事，致野役，而师田作野民，帅而至，掌其政治禁令。

遂师：各掌其遂之政令戒禁。以时登其夫家之众寡、六畜、车犂，辨其施舍与其可任者。经牧其田野，辨其可食者，周知其数而任之，以征〔其〕财征。作役事，则听其治讼。巡其稼穡而移用其民，以救其时事。凡国祭祀，审其誓戒，共其野牲。入野职、野赋于玉府。宾客，则巡其道修，庀其委积。大丧，使帅其属以幄帘先，道野役，及窆，抱磨，共丘笼及厘车之役。军旅、田猎，平野民，掌其禁令，比叙其事而赏罚。

遂大夫：各掌其遂之政令。以岁时稽其夫家之众寡、六畜、田野，辨其可任者与其可施舍者，以教稼穡，以稽功事。掌其政令戒禁，听其治讼。令为邑者，岁终则会政致事。正岁

简稼器，修稼政。三岁大比，则帅其吏而兴甿，明其有功者，属其地治者。凡为邑者，以四达戒其功事，而诛赏废兴之。

县正：各掌其县之政令征比，以颁田里，以分职事；掌其治讼，趋其稼事而赏罚之。若将用野民师、田、行、役、移执事，则帅而至，治其政令。既役，则稽功会事而诛赏。

鄙师：各掌其鄙之政令、祭祀。凡作民，则掌其戒令。以时数其众庶，而察其媿恶而诛赏。岁终，则会其鄙之政而致事。

酇长：各掌其酇之政令，以时校登其夫家，比其众寡，以治其丧纪、祭祀之事。若作其民而用之，则以旗鼓兵革帅而至。若岁时简器，与有司数之。凡岁时之戒令皆听之，趋其耕耨，稽其女功。

里宰：掌比其邑之众寡与其六畜、兵器，治其政令。以岁时合耦于耬，以治稼穡，趋其耕耨，行其秩叙，以待有司之政令，而征敛其财赋。

邻长：掌相纠相受。凡邑中之政相赞。徙于他邑，则从而授之。

旅师：掌聚野之耬粟、屋粟、闲粟而用之。以质剂致民，平颁其兴积，施其惠，散其利，而均其政令。凡用粟，春颁而秋敛之。凡新甿之治皆听之，使无征役，以地之媿恶为之等。

稍人：掌令丘乘之政令。若有会、同、师、田、行、役之事，则以县师之法作其同徒、輦輦，帅而以至，治其政令，以听于司马。大丧，帅蜎车与其役以至，掌其政令，以听于司徒。

委人：掌敛野之赋，敛薪刍，凡疏材、木材，凡畜聚之物。以稍聚待宾客，以甸聚待羈旅。凡其（余）（馀）聚以待颁赐。以式法共祭祀之薪蒸木材。宾客，共其刍薪。丧纪，共其薪蒸木材。

军旅，共其委积薪刍凡疏材，共野委兵器与其野圉财用。凡军旅之宾客，馆焉。

土均：掌平土地之政，以均地守，以均地事，以均地贡，以和邦国都鄙之政令、刑禁与其施舍。礼俗、丧纪、祭祀，皆以地媿恶为轻重之法而行之，掌其禁令。

草人：掌土化之法，以物地、相其宜而为之种。凡粪种，騂刚用牛，赤緹用羊，坟壤用麋，渴泽用鹿，咸潟用豕，勃壤用狐，埴垆用豕，强隘用豕，轻票用犬。

稻人：掌稼下地。以渚畜水，以防止水，以沟荡水，以遂均水，以列舍水，以浍写水，以涉扬其芟，作田。凡稼泽，夏以水殄草而芟蕪之。泽草所生，种之芒种。旱暵，共其雩斂。丧纪，共其苇事。

土训：掌道地图，以诏地事。道地愿，以辨地物而原其生，以诏地求。王巡守，则夹王车。

诵训：掌道方志，以诏观事。掌道方愿，以诏辟忌，以知地俗。王巡守，则夹王车。

山虞：掌山林之政令，物为之厉而为之守禁。仲冬斩阳木，仲夏斩阴木。凡服耜，斩季材，以时入之。令万民时斩材，有期日。凡邦工入山林而抡材，不禁。春秋之斩木，不入禁。凡窃木者，有刑罚。若祭山林，则为主而修除，且蹕。若大田猎，则莱山田之野；及弊田，植虞旗于中，致禽而珥焉。

林衡：掌巡林麓之禁令而平其守，以時計林麓而赏罚之。

若斩木材，则受法于出虞，而掌其政令。

川衡：掌巡川泽之禁令而平其守。以时舍其守，犯禁者执而诛罚之。祭祀、宾客，共川奠。

泽虞：掌国泽之政令，为之厉禁。使其地之人守其财物，以时入之于玉府，颁其余于万民。凡祭祀、宾客，共泽物之奠。丧纪，共其苇蒲之事。若大田猎，则莱泽野；及弊田，植虞旗以属禽。

迹人：掌邦田之地政，为之厉禁而守之。凡田猎者受令焉。

禁鷩鷩者与其毒矢射者。



矿人：掌金玉锡石之地，而为之厉禁以守之。若以时取之，则物其地，图而授之。巡其禁令。

角人：掌以时征齿角凡骨物于山泽之农，以当邦赋之政令。以度量受之，以共财用。

羽人：掌以时征羽翮之政于山泽之农，以当邦赋之政令。

凡受羽，十羽为审，百羽为抔，十抔为缚。

掌葛：掌以时征絺绤之材于山农，凡葛征，征草贡之材于泽农，以当邦赋之政令。以权度受之。

掌染草：掌以春秋敛染草之物，以权量受之，以待时而颁之。

掌炭：掌灰物炭物之征令，以时入之。以权量受之，以共邦之用，凡炭灰之事。

掌茶：掌以时聚茶以共丧事。征野疏材之物以待邦事，凡畜聚之物。

掌蜃：掌敛互物蜃物，以共闾圻之蜃。祭祀，共蜃器之蜃。

共白盛之蜃。

圉人：掌圉游之兽禁。牧百兽。祭祀、丧纪、宾客，共其生兽、死兽之物。

场人：掌国之场圃，而树之果蓏珍异之物，以时敛而藏之。

凡祭祀、宾客，共其果蓏，享亦如之。

廩人：掌九谷之数，以待国之匪颁、赐、稍食。以岁之上下数邦用，以知足否，以诏谷用，以治年之凶丰。凡万民之食食者，人四鬴，上也；人三鬴，中也；人二鬴，下也。若食不能人二鬴，则令邦移民就谷，诏王杀邦用。凡邦有会、同、师、役之事，则治其粮与其食。大祭祀，则（共其）接盛。

舍人：掌平宫中之政，分其财守，以法掌其出入。凡祭祀，共簠簋，实之，陈之。宾客，亦如之，共其礼：车米、筥米、刍禾。

丧纪，共饭米、熬谷。以岁时县稷秬之种，以共王后之春献种。

掌米粟之出入，辨其物。岁终，则会计其政。

仓人：掌粟入之藏。辨九谷之物，以待邦用。若谷不足，则止馀法用；有馀则藏之，以待凶而颁之。凡国之大事，共道路之谷积、食饮之具。

司禄：阙。

司稼：掌巡邦野之稼，而辨稷秬之种，周知其名与其所宜地，以为法而县于邑闾。巡野观稼，以年之上下出敛法。掌均万民之食，而赈其急，而平其兴。

春人：掌共米物。祭祀，共其粢盛之米。宾客，共其牢礼之米。凡飧食，共其食米。掌凡米事。

饔人：掌凡祭祀共盛，共王及后之六食。凡宾客，共其簠簋之实，飧食亦如之。

藁人：掌共外内朝冗食者之食。若飧耆老、孤子、士庶子，共其食。掌豢祭祀之犬。

## 春官宗伯第三

惟王建国，辨方正位，体国经野，设官分职，以为民极。乃立春官宗伯，使帅其属而掌邦礼，以佐王和邦国。礼官之属：大宗伯，卿一人。小宗伯，中大夫二人。肆师，下大夫四人。

上士八人，中士十有六人，旅下士三十有二人。府六人，史十有二人，胥十有二人，徒百有二十人。

郁人：下士二人。府二人，史一人，徒八人。

鬯人：下士二人。府一人，史一人，徒八人。

鸡人：下士一人。史一人，徒四人。

司尊彝：下士二人。府四人，史二人，胥二人，徒二十人。

司几筵：下士二人。府二人，史一人，徒八人。

天府：上士一人，中士二人。府四人，史二人，胥二人，徒二十人。  
典瑞：中士二人。府二人，史二人，胥一人，徒十人。  
典命：中士二人。府二人，史二人，胥一人，徒十人。  
司服：中士二人。府二人，史一人，胥一人，徒十人。  
典祀：中士二人，下士四人。府二人，史二人，胥四人，徒四十人。  
守桃：奄八人，女桃每庙二人，奚四人。  
世妇：每宫卿二人，下大夫四人，中士八人，女府二人，女史二人，奚十有六人。  
内宗，凡内女之有爵者。  
外宗，凡外女之有爵者。  
冢人：下大夫二人，中士四人。府二人，史四人，胥十有二人，徒百有二十人。  
墓大夫：下大夫二人，中士八人。府二人，史四人，胥二十人，徒二百人。  
职丧：上士二人，中士四人，下士八人。府二人，史四人，胥四人，徒四十人。  
大司乐，中大夫二人。乐师，下大夫四人。上士八人，下士十有六人。府四人，史八人，胥八人，徒八十人。  
大胥，中士四人。小胥，下士八人。府二人，史四人，徒四十人。  
大师，下大夫二人。小师，上士四人。瞽矇，上瞽四十人，中瞽百人，下瞽百有六十人。视瞭，三百人。府四人，史八人，胥十有二人，徒百有二十人。  
典同：中士二人。府一人，史一人，胥二人，徒二十人。  
磬师：中士四人，下士八人。府四人，史二人，胥四人，徒四十人。钟师：中士四人，下士八人。府二人，史二人，胥六人，徒六十人。  
笙师：中士二人，下士四人。府二人，史二人，胥一人，徒十人。  
搏师：中士二人，下士四人。府二人，史二人，胥二人，徒二十人。  
鞀师：下士二人。府一人，史一人，舞者十有六人，徒四十人。  
旄人：下士四人。舞者众寡无数，府二人，史二人，胥二人，徒二十人。  
龠师：中士四人。府二人，史二人，胥二人，徒二十人。  
龠章：中士二人，下士四人。府一人，史一人，胥二人，徒二十人。  
鞀鞀氏：下士四人。府一人，史一人，胥二人，徒二十人。  
典庸器：下士四人。府四人，史二人，胥八人，徒八十人。  
司干：下士二人。府二人，史二人，徒二十人。  
大卜，下大夫二人。卜师，上士四人。卜人，中士八人，下士十有六人。府二人，史二人，胥四人，徒四十人。  
龟人：中士二人。府二人，史二人，工四人，胥四人，徒四十人。  
菴氏：下士二人。史一人，徒八人。  
占人：下士八人。府一人，史二人，徒八人。  
筮人：中士二人。府一人，史二人，徒四人。  
占梦：中士二人。史二人，徒四人。  
视祲：中士二人。史二人，徒四人。  
大祝，下大夫二人，上士四人。小祝，中士八人，下士十有六人。府二人，史四人，胥四人，徒四十人。  
丧祝：上士二人，中士四人，下士八人。府二人，史二人，胥四人，徒四十人。  
甸祝：下士二人。府一人，史一人，徒四人。  
诅祝：下士二人。府一人，史一人，徒四人。  
司巫：中士二人。府一人，史一人，胥一人，徒十人。  
男巫，无数。女巫，无数。其师，中士四人。府二人，史四人，胥四人，徒四十人。

大史，下大夫二人，上士四人。小史，中士八人，下士十有六人。府四人，史八人，胥四人，徒四十人。

冯相氏：中士二人，下士四人。府二人，史四人，徒八人。

保章氏：中士二人，下士四人。府二人，史四人，徒八人。

内史：中大夫一人，下大夫二人，上士四人，中士八人，下士十有六人。府四人，史八人，胥四人，徒四十人。

外史：上士四人，中士八人，下士十有六人。胥二人，徒二十人。

御史：中士八人，下士十有六人。其史百有二十人，府四人，胥四人，徒四十人。

巾车：下大夫二人，上士四人，中士八人，下士十有六人。

府四人，史八人，工百人，胥五人，徒五十人。

典路：中士二人，下士四人。府二人，史二人，胥二人，徒二十人。

车仆：中士二人，下士四人。府二人，史二人，胥二人，徒二十人。

司常：中士二人，下士四人。府二人，史二人，胥四人，徒四十人。

都宗人：上士二人，中士四人。府二人，史四人，胥四人，徒四十人。

家宗人，如都宗人之数。

凡以神士者无数，以其艺为之贵贱之等。

大宗伯之职：掌建邦之天神、人鬼、地祇之礼，以佐王建保邦国。

以吉礼事邦国之鬼神祇：以禋祀祀昊天上帝，以实柴祀日月星辰，以槩燎祀司中、司命、风师、雨师。以血祭祭社稷、五祀、五岳。以絺沉祭山林川泽，以醴辜祭四方百物。以肆献裸享先王，以馈食享先王，以祠春享先王，以杓夏享先王，以尝秋享先王，以丞冬享先王。

以凶礼哀邦国之忧：以丧礼哀死亡，以荒礼哀凶札，以吊礼哀祸灾，以赙礼哀围败，以恤礼哀寇乱。

以宾礼亲邦国：春见曰朝，夏见曰宗，秋见曰觐，冬见曰遇，时见曰会，殷见曰同，时聘曰问，殷覲曰视。

以军礼同邦国：大师之礼，用众也；大均之礼，恤众也；大田之礼，简众也；大役之礼，任众也；大封之礼，合众也。

以嘉礼亲万民：以饮食之礼亲宗族兄弟，以昏冠之礼亲成男女，以宾射之礼亲故旧朋友，以飧燕之礼亲四方之宾客，以[月+辰]牖之礼亲兄弟之国，以贺庆之礼亲异姓之国。

以九仪之命正邦国之位：壹命受职，再命受服，三命受位，四命受器，五命赐则，六命赐官，七命赐国，八命作牧，九命作伯。

以玉作六瑞，以等邦国：王执镇圭，公执桓圭，侯执信圭，伯执躬圭，子执谷璧，男执蒲璧。

以禽作六挚，以等诸臣：孤执皮帛，卿执羔，大夫执雁，士执雉，庶人执鹩，工商执鸡。

以玉作六器，以礼天地四方：以苍璧礼天，以黄琮礼地，以青圭礼东方，以赤璋礼南方，以白琥礼西方，以玄璜礼北方。皆有牲币，各放其器之色。

以天产作阴德，以中礼防之。以地产作阳德，以和乐防之。

以礼乐合天地之化、百物之产，以事鬼神，以谐万民，以致百物。

凡祀大神、享大鬼、祭大祇，帅执事而卜曰，宿，视涤濯，莅玉鬯，省牲、饔，奉玉粢，诏大号，治其大礼，诏相王之大礼。若王不与祭祀，则摄位。凡大祭祀，王后不与，则摄而荐豆笾，彻。

大宾客，则摄而载果。朝觐会同，则为上相。大丧，亦如之。

王哭诸侯，亦如之。王命诸侯，则傧。国有大故，则旅上帝及四望。王大封，则先告后土。乃颁祀于邦国、都家、乡邑。

小宗伯之职：掌建国之神位，右社稷，左宗庙。兆五帝于四郊，四望、四类亦如之。兆

山川、丘陵、坟衍，各因其方。

掌五礼之禁令与其用等。辨庙祧之昭穆。辨吉凶之五服、车旗、宫室之禁。

掌三族之别，以辨亲疏，一一其正室皆谓之“门子”一掌其政令。

毛六牲，辨其名物而颁之于五官，使共奉之。辨六粢之名物与其用，使六宫之人共奉之。辨六彝之名物，以待果将。辨六尊之名物，以待祭祀、宾客。

掌衣服、车旗、宫室之赏赐。

掌四时祭祀之序事与其礼。若国大贞，则奉玉帛以诏号。

大祭祀，省牲，视涤濯。祭之日，逆粢，省饔，告时于王，告备于王。

凡祭祀、宾客，以时将瓊果。诏相祭祀之小礼。凡大礼，佐大宗伯。赐卿、大夫、士爵，则侯。小祭祀，掌事，如大宗伯之礼。

大宾客，受其将币之赉。若大师，则帅有司而立军社、奉主车。

若军将有事（于四望）。则与祭有司将事（于四望）。若大甸，则帅有司而饔兽于郊，遂颁禽。大灾，及执事祷祠于上下神祇。

王崩，大肆，以秬鬯溲。及执事涖小斂大斂，帅异族而佐，县衰冠之式于路门之外。及执事[目+氏]葬，献器，遂哭之。卜葬兆，甫[穴+毳]，亦如之。既葬，诏相丧祭之礼，成葬而祭奠，为位。

凡国之大礼，佐大宗伯。凡小礼，掌事，如大宗伯之仪。

肆师之职：

掌立国祀之礼，以佐大宗伯。立大相，用玉帛、牲牲。立次祀，用牲币。立小祀，用牲。以岁时序其祭祀及其祈珥。大祭祀，展牺牲，系于牢，颁于职人。凡祭祀之卜日、宿为期，诏相其礼，视涤濯亦如之。祭之日，表粢盛，告洁；展器陈，告备；及果，筑煮。相治小礼，诛其慢怠者。掌兆中、庙中之禁令。凡祭祀礼成，则告事毕。

大宾客，莅筵几，筑煮，赞果将。大朝觐，佐侯。共设匪瓮之礼。飧食，授祭。与祝侯饗于疆及郊。

大丧，大溲以鬯，则筑煮。令外内命妇序哭。禁外内命男女之衰不中法者，且授之杖。

凡师甸，用牲于社宗，则为位。类造上帝，封于大神，祭兵于山川，亦如之。凡师不功，则助牵主车。凡四时之大甸猎，祭表貉，则为位。

尝之日，莅卜来岁之芟。猕之日，莅卜来岁之戒。社之日，莅卜来岁之稼。

若国有大故，则令国人祭。岁时之祭祀亦如之。凡卿大夫之丧，相其礼。凡国之大事，治其礼仪，以佐宗伯。凡国之小事，治其礼仪而掌其事，如宗伯之礼。

郁人：掌裸器。凡祭祀、宾客之裸事，和郁鬯以实彝而陈之。凡裸玉，濯之陈之，以赞裸事。诏裸将之仪与其节。凡裸事，沃盥。大丧之溲，共其肆器；及葬，共其裸器，遂狸之。大祭祀，与量人受举斚之卒爵而饮之。

鬯人：掌共秬鬯而饰之。凡祭祀，社壇用大罍，禋们用瓢罍，庙用脩。凡山川四方用蜃，凡（裸）（狸）事用概，凡鬯事用散。大丧之大溲，设斗，共其衅鬯。凡王之齐事，王其秬鬯。凡王吊临，共介鬯。

鸡人：掌共鸡牲，辨其物。大祭祀，夜呼旦以叫百官。凡国之大宾客、会同、军旅，丧纪，亦如之。凡国事为期，则告之时。

凡祭祀，面禋，衅，共其鸡牲。

司尊彝：掌六尊、六彝之位，诏其酌，辨其用与其实。春祠、夏杓，裸用鸡彝、鸟彝，皆有舟。其朝践用两献尊，其再献用两象尊，皆有罍。诸臣之所昨也。秋尝、冬烝，裸用斚彝、黄彝，皆有舟。其朝献用两著尊，甚饌献用两壶尊，皆有罍。诸臣之所昨也。凡四时之间祀、追享、朝享，裸用虎彝、雌彝，皆有舟。其朝践用两大尊，其再献用两山尊，皆有罍。诸臣之所昨也。凡六彝、六尊之酌，郁齐献酌，醴齐缩酌，盎齐浚酌，凡酒修酌。大丧，存

奠彝，大旅亦如之。

司几筵：掌五几、五席之名物，辨其用与其位。凡大朝觐、大飨射，凡封国、命诸侯，王位设黼依，依前南乡，设莞筵纷纯，加纁席画纯，加次席黼纯，左右玉几。祀先王、昨席，亦如之。——诸侯祭祀席蒲筵纁纯，加莞席纷纯，右雕几。昨席莞筵纷纯，加纁席画纯。筵国宾于牖前亦如之；左彤几。——甸役，则设熊席，右漆几。凡丧事，设苇席，右素几。其柏席用萑黼纯，——诸侯则纷纯，——每敦一几。凡吉事变几，凶事仍几。

天府：掌祖庙之守藏与其禁令。凡国之玉镇、大宝器藏焉。若有大祭、大丧，则出而陈之；既事，藏之。凡官府乡州及都鄙之治中，受而藏之，以诏王察群吏之治。上春，衅宝镇及宝器。凡吉凶之事，祖庙之中沃盥，执烛。季冬，陈玉，以贞来岁之蠹恶。若迁宝，则奉之。若祭天之司民、司禄而献民数、谷数，则受而藏之。

典瑞：掌玉瑞、玉器之藏，辨其名物与其用事，设其服饰。王晋大圭，执镇圭，纁藉五采五就，以朝日。公执桓圭，侯执信圭，伯执躬圭，纁皆三采三就；子执谷璧，男执蒲璧，纁皆二采再就；以朝、觐、宗、遇、会、同于王。诸侯相见，亦如之。瑋圭璋璧琮，纁皆二采一就，以覲聘。四圭有邸，以祀天、旅上帝。两圭有邸，以祀地、旅四望。裸圭有瓚，以肆先王，以裸宾客。圭璧，以祀日月星辰。璋邸射，以祀山川，以造赠宾客。土圭以致四时日月，封国则以土地。珍圭以征守，以恤凶荒。牙璋以起军旅，以治兵守。璧琕以起度。珪圭、璋、璧、琮、琥、璜之渠眉，疏璧琮以敛尸。谷圭以和难，以聘女。琬圭以治德，以结好。琰圭以易行，以除慝。大祭祀，大旅，凡宾客之事，共其玉器而奉之。大丧，共饭玉、含玉、赠玉。凡玉器出，则共奉之。

典命：掌诸侯之五仪、诸臣之五等之命。上公九命为伯，其国家、宫室、车旗、衣服、礼仪皆以九为节。侯伯七命，其国家、宫室、车旗、衣服、礼仪皆以七为节。子男五命，其国家、宫室、车旗、衣服、礼仪皆以五为节。王之三公八命，其卿六命，其大夫四命；及其出封，皆加一等，其国家、宫室、车旗、衣服、礼仪亦如之。凡诸侯之适子，誓于天子，摄其君，则下其君之礼一等，未誓，则以皮帛继子男。公之孤四命，以皮帛视小国之君，其卿三命，其大夫再命，其士壹命，其宫室、车旗、衣服、礼仪各视其命之数；侯伯之卿、大夫、士亦如之。子男之卿再命，其大夫壹命，其士不命，其宫室、车旗、衣服、礼仪各视其命之数。

司服：掌王之吉凶衣服，辨其名物与其用事。王之吉服：祀昊天上帝，则服大裘而冕，祀五帝亦如之；享先王，则衮冕；享先公，飨，射，则鷩冕；祀四望山川，则毳冕；祭社稷、五祀，则希冕；祭群小祀，则玄冕。凡兵事，韦弁服。视朝，则皮弁服。凡甸，冠弁服。凡凶事，服弁服。凡吊事，弁经服。凡丧，为天王斩衰，为王后齐衰。王为三公六卿锡衰，为诸侯缌衰，为大夫、士疑衰，其首服皆弁经。大札、大荒、大灾，素服。公之服，自豪冕而下，如王之服。侯伯之服，自鷩冕而下，如公之服。子男之服，自毳冕而下，如侯伯之服。孤之服，自希冕而下，如子男之服。卿大夫之服，自玄冕而下，如孤之服；其凶服，加以大功、小功。士之服，自皮弁而下，如大夫之服，其凶服亦如之。其齐服有玄端、素端。凡大祭祀、大宾客，共其衣服而奉之。大丧，共其复衣服、敛衣服、奠衣服、廋衣服，皆掌其陈序。

典祀：掌外祀之兆守，皆有域，掌其（政）〔禁〕令。若以时祭祀，则帅其属而修除，征役于司隶而役之。及祭，帅其属而守其厉禁而辟之。

守祧：掌守先王先公之庙祧，其遗衣服藏焉。若将祭祀，则各以其服授尸。其庙，则有司修除之；其祧，则守祧黜陟之。既祭，则藏其隋与其服。

世妇：掌女宫之宿戒及祭祀，比其具。诏王后之礼事。帅六宫之人共粢盛。相外内宗之礼事。大宾客之飧食，亦如之。

大丧，比外内命妇之朝莫哭不敬者，而苛罚之。凡王后有拜事于妇人，则诏相。凡内事

有达于外官者，世妇掌之。

内宗：掌宗庙之祭祀，荐加豆笾。及以乐彻，则佐传豆笾。

宾客之飧食，亦如之。主后有事，则从。大丧，序哭者；哭诸侯亦如之。凡卿大夫之丧，掌其吊临。

外宗：掌宗庙之祭祀，佐王后荐玉豆，视豆笾；及以乐彻，亦如之。王后以乐羞粢，则赞。凡王后之献，亦如之。王后不与，则赞宗伯。小祭祀，掌事；宾客之事亦如之。大丧，则叙外内朝莫哭者，哭诸侯亦如之。

冢人：掌公墓之地，辨其兆域而为之图。先王之葬居中，以昭穆为左右。凡诸侯居左右以前，卿、大夫、士居后，各以其族。

凡死于兵者，不入兆域。凡有功者，居前。以爵等为丘封之度与其树数。大丧既有日，请度甫窆，遂为之尸；及窆，以度为丘隧，共丧之窆器；及葬，言鸾车象人；及窆，执斧以莅；遂入，藏凶器。正墓位，辟墓域，守墓禁。凡祭墓，为尸。凡诸侯及诸臣葬于墓者，授之兆，为之辟，均其禁。

墓大夫：掌凡邦墓之地域，为之图。令国民族葬，而掌其禁令；正其位，掌其度数，使皆有私地域。凡争墓地者，听其狱讼。

帅其属而巡墓厉，居其中之室以守之。

职丧：掌诸侯之丧及卿、大夫、士凡有爵者之丧，以国之丧礼莅其禁令，序其事。凡国有司以王命有事焉，则诏赞主人。凡其丧祭，诏其号，治其礼。凡公有司之所共，职丧令之，趣其事。

大司乐：掌成均之法，以治建国之学政，而合国之子弟焉。

凡有道者、有德者，使教焉；死则以为乐祖，祭于瞽宗。以乐德教国子：中，和，祗，庸，孝，友。以乐语教国子：兴，道，讽，诵，言，语。以乐舞教国子舞《云门》、《大卷》、《大咸》、《大磬》、《大夏》、《大濩》、《大武》。以六律、六同、五声、八音、六舞，大合乐以致鬼神祗，以和邦国，以谐万民，以安宾客，以说远人，以作动物。乃分乐而序之，以祭，以享，以祀。乃奏黄钟，歌大吕，舞《云门》，以祀天神。乃奏大蕤，歌应钟，舞《咸池》，以祭地祗。乃奏姑洗，歌南吕，舞《大磬》，以祀四望。乃奏蕤宾，歌函钟，舞《大夏》，以祭山川。乃奏夷则，歌小吕，舞《大濩》，以享先妣。乃奏无射，歌夹钟，舞《大武》，以享先祖。凡六乐音，文之以五声，播之以八音。凡六乐者，一变而致羽物及川泽之祗，再变而致裸物及山林之祗，三变而致鳞物及丘陵之祗，四变而致毛物及坟衍之祗，五变而致介物及土祗，六变而致象物及天神。

凡乐，圜钟为宫，黄钟为角，大蕤为徵，姑洗为羽，雷鼓雷鼗，孤竹之管，云和之琴瑟，《云门》之舞；冬至，于地上之圜丘奏之，若乐六变，则天神皆降，可得而礼矣。凡乐，函钟为宫，大蕤为角，姑洗为徵，南吕为羽，灵鼓灵鼗，孙竹之管，空桑之琴瑟，《咸池》之舞；夏日至，于泽中之方丘奏之，若乐八变，则地祗皆出，可得而礼矣。凡乐，黄钟为宫，大吕为角，大蕤为徵，应钟为羽，路鼓路鼗，阴竹之管，龙门之琴瑟，《九德》之歌，《九磬》之舞；于宗庙之中奏之，若乐九变，则人鬼可得而礼矣。

凡乐事：大祭祀，宿县，遂以声展之。王出入，则令奏《王夏》；尸出入，则令奏《肆夏》；牲出入，则令奏《昭夏》。帅国子而舞。大飧不入牲，其他皆如祭祀。大射，王出入，令奏《王夏》；及射，令奏《鸾虞》。诏诸侯以弓矢舞。王大食，三宥，皆令奏钟鼓。王师大献，则令奏恺乐。凡日月食，四镇五岳崩，大傀异灾，诸侯薨，令去乐。大札、大凶、火灾、大臣死，凡国之大忧，令弛县。凡建国，禁其淫声、过声、凶声、慢声。大丧，蒞厥乐器；及葬，藏乐器，亦如之。

乐师：掌国学之政，以教国子小舞。凡舞，有帔舞，有羽舞，有皇舞，有旄舞，有干舞，有人舞。教乐仪，行以《肆夏》，趋以《采芡》，车亦如之。环拜，以钟鼓为节。凡射，王

以《騶虞》为节，诸侯以《狸首》为节，大夫以《采蘋》为节，士以《采芣》为节。凡乐，掌其序事，治其乐政。凡国之小事用乐者，令奏钟鼓。凡乐成，则告备。诏来瞽皋舞，（诏）及彻，帅学士而歌彻；令相。飧食诸侯，序其乐事，令奏钟鼓，令相，如祭之仪。燕射，帅射夫以弓矢舞。乐出入，令奏钟鼓。凡军大猷，教恺歌，遂倡之。凡丧，陈乐器，则帅乐官；及序哭，亦如之。凡乐官，掌其政令，听其治讼。

大胥：掌学士之版，以待致诸子。春，入学，舍采合舞。秋，颁学合声。以六乐之会正舞位，以序出入舞者，比乐官，展乐器。凡祭祀之用乐者，以鼓征学士。序宫中之事。

小胥：掌学士之征令而比之，觐其不敬者，巡舞列而挹其怠慢者。正乐县之位，王宫县，诸侯轩县，卿大夫判县，士特县，辨其声。凡县钟磬，半为堵，全为肆。

大师：掌六律、六同，以合阴阳之声。阳声：黄钟，大簇，姑洗，蕤宾，夷则，无射。阴声：大吕，应钟，南吕，函钟，小吕，夹钟。皆文之以五声：宫、商、角、徵、羽。皆播之以八音：金、石、土、革、丝、木、匏、竹。教六诗，曰风，曰赋，曰比，曰兴，曰雅，曰颂；以六德为之本，以六律为之音。大祭祀：帅登歌，令奏击拊；下管，播乐器，令奏鼓楛。大飧亦如之。大射，帅瞽而歌射节。

大师，执同律以听军声而诏吉凶。大丧，帅瞽而廞，作柩谥。凡国之瞽矇，正焉。

小师：掌教鼓鼗、柷、敔、圉、箫、管、弦、歌。大祭祀：登歌击拊；下管，击应鼓；彻，歌。大飧，亦如之。大丧，与廞。凡小祭事、小乐事，鼓楛。掌六乐声音之节与其和。

瞽矇：掌播鼗、柷、敔、圉、箫、管、弦、歌。讽诵诗，世奠系，鼓琴瑟。掌《九德》、六诗之歌，以役大师。

视瞭：掌凡乐事播鼗，击颂磬、笙磬。掌大师之县。凡乐事，相瞽。大丧，廞乐器；大旅亦如之。宾、射，皆奏其钟鼓；鼗、恺猷，亦如之。

典同：掌六律、六同之和，以辨天地四方阴阳之声，以为乐器。凡声，高声礶，正声缓，下声肆，陂声散，险声敛，达声羸，微声鬴，回声衍，侈声箝，弇声郁，薄声甄，厚声石。凡为乐器，以十有二律为之数度，以十有二声为之齐量。凡和乐亦如之。

磬师：掌教击磬、击编钟。教缦乐、燕乐之钟磬。凡祭祀，奏缦乐。

钟师：掌金奏。凡乐事，以钟鼓奏九夏：《王夏》、《肆夏》、《昭夏》、《纳夏》、《章夏》、《齐夏》、《族夏》、《泮夏》、《骜夏》。凡祭祀、飧食，奏燕乐。凡射：王，奏《騶虞》；诸侯，奏《狸首》；卿大夫，奏《采蘋》；士，奏《采芣》。掌鞀，鼓缦乐。

笙师：掌教吹竽、笙、圉、龠、箫、篪、笛、管，舂牍、应、雅，以教泮乐。凡祭祀、飧、射，共其钟笙之乐，燕乐亦如之。大丧，廞其乐器；及葬，奉而藏之。大旅，则陈之。

搏师：掌金奏之鼓。凡祭祀，鼓其金奏之乐；飧食、宾射，亦如之。军大猷，则鼓其恺乐。凡军之夜三鼗，皆鼓之；守鼗亦如之。大丧，廞其乐器，奉而藏之。

鞀师：掌教鞀乐。祭祀，则帅其属而舞之；大飧亦如之。

旄人：掌教舞散乐、舞夷乐。凡四方之以舞仕者属焉。凡祭祀、宾客，舞其燕乐。

龠师：掌教国子舞羽吹龠。祭祀，则鼓羽龠之舞；宾客、飧食，则亦如之。大丧，廞其乐器，奉而藏之。

龠章：掌土鼓、豳龠。中春，昼击土鼓，吹《豳》诗，以逆暑。

中秋，夜迎寒，亦如之。凡国祈年于田祖，吹《豳》雅，击土鼓，以乐田畯。国祭蜡，则吹《豳》颂，击土鼓，以息老物。

鞀鞀氏：掌四夷之乐与其声歌。祭祀，则吹而歌之；燕亦如之。

典庸器：掌藏乐器、庸器。及祭祀，帅其属而设筍簠、陈庸器；飧食、宾射亦如之。大丧，廞筍簠。

司干：掌舞器。祭祀，舞者既陈，则授舞器；既舞则受之。

宾、飧亦如之。大丧，廞舞器；及葬，奉而藏之。

大卜：掌三兆之法，一曰《王兆》，二曰《瓦兆》，三曰《原兆》。其经兆之体，皆百有二十，其颂皆千有二百。掌三易之法，一曰《连山》，二曰《归藏》，三曰《周易》。其经卦皆八，其别皆六十有四。掌三梦之法：一曰《致梦》，二曰《觴梦》，三曰《咸陟》。

其经运十，其别九十。以邦事作龟之八命，一曰征，二曰象，三曰与，四曰谋，五曰果，六曰至，七曰雨，八曰瘳。以八命者赞三兆、三易、三梦之占，以观国家之吉凶，以诏救政。凡国大贞，卜立君，卜大封，则视高作龟。大祭祀，则视高命龟。凡小事，涖卜。国大迁、大师，则贞龟。凡旅，陈龟。凡丧事，命龟。

卜师：掌开龟之四兆，一曰方兆，二曰功兆，三曰义兆，四曰弓兆。凡卜事，视高。扬火以作龟，致其墨。凡卜，辨龟之上下、左右、阴阳，以授命龟者而诏相之。

龟人：掌六龟之属，各有名物。天龟曰灵属，地龟曰绎属，东龟曰果属，西龟曰雷属，南龟曰猎属，北龟曰若属。各以其方之色与其体辨之。凡取龟用秋时，攻龟用春时，各以其物入于龟室。上春衅龟，祭祀先卜。若有祭事，则奉龟以往；旅亦如之，丧亦如之。

菡氏：掌共燂契，以待卜事。凡卜，以明火爇燂，遂吹其燂契，以授卜师，遂役之。

占人：掌占龟，以八筮占八颂，以八卦占筮之八故，以视吉凶。凡卜筮，君占体，大夫占色，史占墨，卜人占坼。凡卜筮，既事，则系币以比其命。岁终，则计其占之中否。

筮人：掌三易以辨九筮之名，一一曰《连山》，二曰《归藏》，三曰《周易》。九筮之名，一曰巫更，二曰巫咸，三曰巫式，四曰巫目，五曰巫易，六曰巫比，七曰巫祠，八曰巫参，九曰巫环。一一以辨吉凶。凡国之大事，先筮而后卜。上春，相筮。凡国事，共筮。

占梦：掌其岁时，观天地之会，辨阴阳之气。以日月星辰占六梦之吉凶，一曰正梦，二曰噩梦，三曰思梦，四曰寤梦，五曰喜梦，六曰惧梦。季冬聘王梦，献吉梦于王，王拜而受之。乃舍萌于四方，以赠恶梦，遂令始难驱役。

视祲：掌十辉之法，以观妖祥、辨吉凶。一曰祲，二曰象，三曰鑄，四曰监，五曰闾，六曰瞢，七曰弥，八曰叙，九曰隤，十曰想。掌安宅叙降。正岁则行事，岁终则弊其事。

大祝：掌六祝之辞，以事鬼神祇，祈福祥，求永贞。一曰顺祝，二曰年祝，三曰吉祝，四曰化祝，五曰瑞祝，六曰策祝。掌六祈以同鬼神祇，一曰类，二曰造，三曰祴，四曰縢，五曰攻，六曰说。作六辞以通上下、亲疏、远近，一曰祠，二曰命，三曰诰，四曰会，五曰祷，六曰谏。辨六号，一曰神号，二曰鬼号，三曰祇号，四曰牲号，五曰粢号，六曰币号。辨九祭，一曰命祭，二曰衍祭，三曰炮祭，四曰周祭，五曰振祭，六曰擗祭，七曰绝祭，八曰缭祭，九曰共祭。辨九拜，一曰稽首，二曰顿首，三曰空首，四曰振动，五曰吉拜，六曰凶拜，七曰奇拜，八曰褒拜，九曰肃拜，以享右祭祀。凡大禋祀、肆享、祭祇，则执明水火而号祝。隋衅，逆牲逆尸，令钟鼓；右亦如之。来瞽，令皋舞。相尸礼。既祭，令彻。大丧，始崩，以肆鬯润尸，相饭，赞斂，彻奠，言甸人读祷；付、练、祥，掌国事。国有大故、天灾，弥祀社稷，祷祠。大师，宜于社，造于祖，设军社，类上帝，国将有事于四望，及军归献于社，则前祝。大会同，造于庙，宜于社，过大山川，则用事焉；反行，舍奠。建邦国，先告后土，用牲币。禁督逆祀命者。颁祭号于邦国都鄙。

小祝：掌小祭祀将事侯、禋、禘、祠之祝号，以祈福祥，顺丰年，逆时雨，宁风旱，弥灾兵，远罪疾。大祭祀，逆粢盛，送逆尸，沃尸盥，赞隋，赞彻，赞奠。凡事佐大祝。大丧，赞润，设熬，置铭；及葬，设道赍之奠，分祷五祀。大师，掌衅祈号祝。有寇戎之事，则保郊，祀于社。凡外内小祭祀、小丧纪、小会同、小军旅，掌事焉。

丧祝：掌大丧劝防之事。及辟，令启。及朝，御柩，乃奠。及祖，饰棺，乃载，遂御（之）。及葬，御柩出宫，乃代。及圻，说载除饰。小丧，亦如之。掌丧祭祀号。王吊，则与巫前。掌胜国邑之社稷之祝号，以祭祀祷祠焉。凡卿、大夫之丧，掌事而斂饰棺焉。

甸祝：掌四时之田表貉之祝号。舍奠于祖庙，祢亦如之。师甸，致禽于虞中，乃属禽；及郊，馐兽，舍奠于祖庙，乃斂禽。禴牲、禴马，皆掌其祝号。



诅祝：掌盟、诅、类、造、攻、说、祓、禳之祝号。作盟诅之载辞，以叙国之信用，以质邦国之剂信。

司巫：掌群巫之政令。若国大旱，则帅巫而舞雩。国有大灾，则帅巫而造巫恒。祭祀，则共圜主及道布及菹馆。凡祭事，守瘞。凡丧事，掌巫降之礼。

男巫，掌望祀、望衍授号，旁招以茅。冬堂赠，无方无算。春招珥，以除疾病。王吊，则与祝前。

女巫：掌岁时拔除、衅浴。旱暵则舞雩。若王后吊，则与祝前。凡邦之大灾，歌哭而请。

大史：掌建邦之六典，以逆邦国之治。掌法以逆官府之治，掌则以逆都鄙之治。凡（辨）（辩）法者考焉，不信者刑之。凡邦国都鄙及万民之有约剂者，藏焉，以贰六官，六官之所登。若约剂乱，则辟法，不信者刑之。正岁年以序事，颁之于官府及都鄙，颁告朔于邦国。闰月，诏王居门终月。大祭祀，与执事卜日。

戒及宿之日，与群执事读礼书面协事。祭之日，执书以次位常，（辨）（辩）事者考焉，不信者诛之。大会同、朝觐，以书协礼事。

及将币之日，执书以诏王。大师，抱天时，与大师同车。大迁国，抱法以前。大丧，执法以莅劝防；遣之日，读谏。凡丧事考焉。

小丧，赐谥。凡射事，饰中，舍算，执其礼事。

小史：掌邦国之志，奠系世，辨昭穆，若有事，则诏王之忌讳。大祭祀，读礼法，史以书叙昭穆之俎簋。大丧、大宾客、大会同、大军旅，佐大史。凡国事之用礼法者，掌其小事。卿大夫之丧，赐谥，读谏。

冯相氏：掌十有二岁、十有二月、十有二辰、十日、二十有八星之位，辨其叙事，以会天位。冬夏致日，春秋致月，以辨四时之叙。

保章氏：掌天星，以志星辰日月之变动，以观天下之迁，辨其吉凶。以星土辨九州之地，所封封域皆有分星，以观妖祥。以十有二岁之相，观天下之妖祥。以五云之物辨吉凶、水旱降、丰荒之浸象。以十有二风，察天地之和、命乖别之妖祥。凡此五物者，以诏救政，访序事。

内史：掌王之八柄之法，以诏王治，一曰爵，二曰禄，三曰废，四曰置，五曰杀，六曰生，七曰予，八曰夺。执国法及国令之贰，以考政事，以逆会计。掌叙事之法，受纳访，以昭王听治。凡命诸侯及孤卿、大夫，则策命之。凡四方之事书，内史读之。王制禄，则赞为之，以方出之；赏赐，亦如之。内史掌书王命，遂贰之。

外史：掌书外令，掌四方之志，掌三皇五帝之书，掌达书名于四方。若以书使于四方，则书其令。

御史：掌邦国都鄙及万民之治令，以赞冢宰。凡治者受法令焉。掌赞书（凡数）（数凡）从政者。

巾车：掌公车之政令，辨其用与其旗物而等叙之，以治其出入。王九五路：一曰玉路，钺，樊纓十有再就，建大常，十有二旂，以祀；金路，钩，樊纓九就，建大旂，以宾，同姓以封；象路，朱，樊纓七就，建大赤，以朝，异姓以封；革路，龙勒，条纓五就，建大白，以即戎，以封四卫；木路，前樊鹄纓，建大麾，以田，以封蕃国。王后之五路：重翟，钺面朱总；厌翟，勒面纓总；安车，雕面鷖总；——皆有容盖。——翟车，贝面组总，有握；辇车，组輓，有翬，羽盖。王之丧车五乘：木车，蒲蔽，犬獫、尾囊，疏饰，小服皆疏；素车，棼蔽，犬獫、素饰，小服皆素；藻车，藻蔽，鹿浅獫、革饰；駟车，萑蔽，然獫、髹饰；漆车，藩蔽，豸獫、雀饰。

服车五乘：孤乘夏篆，卿乘夏纁，大夫乘墨车，士乘栈车，庶人乘役车。凡良车、散车不在等者，其用无常。凡车之出入，岁终则会之，凡赐阙之；毁折，入赍于职币。大丧，饰遣车，遂廋之行；及葬，执盖从车，持旌；及墓，呼启关，陈车。小丧，共柩路与其饰。

岁时更续，共其弊车。大祭祀，鸣铃以应鸡人。

典路：掌王及后之五路，辨其名物与其用说。若有大祭祀，则出路，赞驾说。大丧、大宾客，亦如之。凡会同、军旅、吊于四方，以路从。

车仆：掌戎路之萃、广车之萃、阙车之萃、革车之萃、轻车之萃。凡师，共革车，各以其萃；会同，亦如之。大丧，廋革车。

大射，共三乏。

司常：掌九旗之物名，各有属，以待国事。日月为常，交龙为旂，通帛为旟，杂帛为物，熊虎为旗，鸟隼为旟，龟蛇为旐，全羽为旞，析羽为旛。及国之大阅，赞司马颁旗物：王建大常，诸侯建旂，孤卿建旟，大夫、士建物，师都建旗，州里建旟，县鄙建旐，道车载旞，旂车载旛。皆画其象焉，官府各象其事，州里各象其名，家各象其号。凡祭祀，各建其旗，会同、宾客亦如之；置族门。大丧，共铭族，建廋车之旌；及葬，亦如之。凡军事，建旌旗；及致民，置旗，弊之。甸，亦如之。凡射，共获旌。岁时共更旌。

都宗人：掌都祭祀之礼。凡都祭祀，致福于国。正都礼与其服。若有寇戎之事，则保群神之壇。国有大故，则令祷祠；既祭，反命于国。

家宗人：掌家祭祀之礼。凡祭祀，致福。国有大故，则令祷祠，反命；祭亦如之。掌家礼与其衣服、宫室、车旗之禁令。

凡以神仕者，掌三辰之法，以犹鬼神祇之居，辨其名物。以冬日至致天神人鬼，以夏日至致地祇物魅，以祓国之凶荒、民之札丧。

## 夏官司马第四

惟王建国，辨方正位，体国经野，设官分职，以为民极。乃立夏官司马，使帅其属而掌邦政，以佐王平邦国。政官之属：大司马，卿一人。小司马，中大夫二人。军司马，下大夫四人。舆司马，上士八人。行司马，中士十有六人，旅下士三十有二人。府六人，史十有六人，胥三十有二人，徒三百有二十人。

凡制军，万有二千五百人为军。王六军，大国三军，次国二军，小国一军。军将皆命卿。二千有五百人为师，师帅皆中大夫。五百人为旅，旅帅皆下大夫。百人为卒，卒长皆上士。二十五人为两，两司马皆中士。五人为伍，伍皆有长。一军则二府、六史、胥十人、徒百人。

司勋：上士二人，下士四人。府二人，史四人，胥二人，徒二十人。

马质：中士二人。府一人，史二人，贾四人，徒八人。

量人：下士二人。府一人，史四人，徒八人。

小子：下士二人。史一人，徒八人。

羊人：下士二人。史一人，贾二人，徒八人。

司燿：下士二人。徒六人。

掌固：上士二人，下士八人。府二人，史四人，胥四人，徒四十人。

司险：中士二人，下士四人。史二人，徒四十人。

掌疆：中士八人。史四人，胥十有六人，徒百有六十人。

候人：上士六人，下士十有二人。史六人，徒百有二十人。

环人：下士六人。史二人，徒十有二人。

挈壶氏：下士六人。史二人，徒十有二人。

射人：下大夫二人，上士四人，下士八人。府二人，史四人，胥二人，徒二十人。

服不氏：下士一人。徒四人。

射鸟氏：下士一人。徒四人。

罗氏：下士一人。徒八人。

掌畜：下士二人。史二人，胥二人，徒二十人。

司士：下大夫二人，中士六人，下士十有二人。府二人，史四人，胥四人，徒四十人。

诸子：下大夫二人，中士四人。府二人，史二人，胥二人，徒二十人。

司右：上士二人，下士四人。府四人，史四人，胥八人，徒八十人。

虎賁氏：下大夫二人，中士十有二人。府二人，史八人，胥八十人，虎士八百人。

旅賁氏：中士二人，下士十有六人。史二人，徒八人。

节服氏：下士八人。徒四人。

方相氏：狂夫四人。

太仆，下大夫二人。小臣，上士四人。祭仆，中士六人。御仆，下士十有二人。府二人，史四人，胥二人，徒二十人。

隶仆：下士二人。府一人，史二人，胥四人，徒四十人。

弁师：下士二人。工四人，史二人，徒四人。

司甲：下大夫二人，中士八人。府四人，史八人，胥八人，徒八十人。

司兵：中士四人。府二人，史四人，胥二人，徒二十人。

司戈盾：下士二人。府一人，史二人，徒四人。

司弓矢：下大夫二人，中士八人。府四人，史八人，胥八人，徒八十人。

缮人：上士二人，下士四人。府一人，史二人，胥二人，徒二十人。

（橐）（稿）人：中士四人。府二人，史四人，胥二人，徒二十人。

戎右：中大夫二人，上士二人。

齐右：下大夫二人。

道右：上士二人。

大驭：中大夫二人。

戎仆：中大夫二人。

齐仆：下大夫二人。

道仆：上士十有二人。

田仆：上士十有二人。

驭夫：中士二十人，下士四十人。

校人：中大夫二人，上士四人，下士十有六人。府四人，史八人，胥八人，徒八十人。

趣马：下士，阜一人。徒四人。

巫马：下士二人。医四人，府一人，史二人，贾二大，徒二十人。

牧师：下士四人。胥四人，徒四十人。

唐人：下士，闲二人。史二人，徒二十人。

圉师：乘一人，徒二人。圉人：良马匹一人，弩马丽一人。

职方氏：中大夫四人，下大夫八人，中士十有六人。府四人，史十有六人，胥十有六人，徒百有六十人。

土方氏：上士五人，下士十人。府二人，史五人，胥五人，徒五十人。

怀方氏：中士八人。府四人，史四人，胥四人，徒四十人。

合方氏：中士八人。府四人，史四人，胥四人，徒四十人。

训方氏：中士四人。府四人，史四人，胥四人，徒四十人。

形方氏：中士四人。府四人，史四人，胥四人，徒四十人。

山师：中士二人，下士四人。府二人，史四人，胥四人，徒四十人。

川师：中士二人，下士四人。府二人，史四人，胥四人，徒四十人。

原师：中士四人，下士八人。府四人，史八人，胥八人，徒八十人。

匡人：中士四人。史四人，徒八人。

撝人：中士四人。史四人，徒八人。

都司马：每都上士二人，中士四人，下士八人；府二人，史八人，胥八人，徒八十人。

家司马：各使其臣，以正于公司马。

大司马之职：掌建邦国之九法，以佐王平邦国：制畿封国，以正邦国；设仪辨位，以等邦国；进贤兴功，以作邦国；建牧立监，以维邦国；制军诘禁，以纠邦国；施贡分职，以任邦国；简稽乡民，以用邦国；均守平则，以安邦国；比小事大，以和邦国。

以九伐之法正邦国：冯弱犯寡，则告之；贼贤害民，则伐之；暴内陵外，则坛之；野荒民散，则削之；负固不服，则侵之；贼杀其亲，则正之；放弑其君，则残之；犯令陵政，则杜之；外内乱，鸟兽行，则灭之。

正月之吉，始和布政于邦国都鄙，乃县政象之法于象魏，使万民观政象，挟日而敛之。

乃以九畿之籍，施邦国之政职。方千里曰国畿，其外方五百里曰侯畿，又其外方五百里曰甸畿，又其外方五百里曰男畿，又其外方五百里曰采畿，又其外方五百里曰卫畿，又其外方五百里曰蛮畿，又其外方五百里曰夷畿，又其外方五百里曰镇畿，又其外方五百里曰蕃畿。

凡令赋，以地与民制之。上地食者参之二，其民可用者家三人。中地食者半，其民可用者二家五人。下地食者参之一，其民可用者家二人。

中春教振旅，司马以旗致民，并列陈，如战之陈。辨鼓铎镯铙之用，——王执路鼓，诸侯执贲鼓，军将执晋鼓，师帅执提，旅帅执鞀，卒长执铙，两司马执铎，公司马执镯，——以教坐作、进退、疾徐、疏数之节。遂以蒐田，有司表貉，誓民；鼓，遂围禁；火弊，献禽以祭社。

中夏教茺舍，如振旅之陈。群吏撰车徒，读书契，辨号名之用，帅以门名，县鄙各以其名，家以号名，乡以州名，野以邑名，百官各象其事，以辨军之夜事。其他皆如振旅。遂以苗田如蒐之法，车弊，献禽以享杓。

中秋教治兵，如振旅之陈。辨旗物之用：王载大常，诸侯载旂，军吏载旗，师都载旛，乡（遂）（家）载物，郊野载旐，百官载旂，各书其事与其号焉。其他皆如振旅。遂以猕田如蒐（田）之法，罗弊，致禽以祀访。

中冬教大阅。前期，群吏戒众庶修战法。虞人莱所田之野，为表，百步则一，为三表，又五十步为一表。田之日，司马建旗于后表之中，群吏以旗物鼓铎镯铙，各帅其民而致。质明，弊旗，诛后至者；乃陈车徒如战之陈，皆坐。群吏听誓于陈前，斩牲，以左右徇陈，曰：“不用命者，斩之！”中军以鞀令鼓，鼓人皆三鼓，司马振铎，群吏作旗，车徒皆作。鼓行，鸣镯，车徒皆行，及表乃止。三鼓，搃铎，群吏弊旗，车徒皆坐。又三鼓，振铎作旗，车徒皆作。鼓进，鸣镯，车骤徒趋，及表乃止，坐作如初。乃鼓，车驰徒走，及表乃止。鼓戒三阏，车三发，徒三刺。乃鼓退，鸣铙且却，及表乃止，坐作如初。遂以狩田，以旌为左右和之门，群吏各帅其车徒以叙和出，左右陈车徒，有司平之；旗居卒间以分地，前后有屯百步，有司巡其前后；险野人为主，易野车为主。既陈，乃设驱逆之车，有司表貉于陈前。中军以鞀令鼓，鼓人皆三鼓，群司马振铎，车徒皆作。遂鼓行，徒衔枚而进。大兽公之，小兽私之，获者取左耳。及所弊，鼓皆骇，车徒皆噪。徒乃弊，致禽馐兽于郊；入，献禽以享烝。

及师，大合军，以行禁令，以救无辜、伐有罪。若大师，则掌其戒令，莅大卜，帅执事莅衅主及军器。及致，建大常，比军众，诛后至者。及战，巡陈视事而赏罚。若师有功，则左执律、右秉钺以先，恺乐献于社。若师不功，则厌而奉主车。王吊劳士庶子，则相。

大役，与虑事属其植，受其要，以待考而赏诛。大会同，则帅士庶子而掌其政令。若大射，则合诸侯之六耦。大祭祀、飨食，羞牲鱼，授其祭。大丧，平士大夫。丧祭，奉诏马牲。

小司马之职：掌……凡小祭祀、会同、飨射、师田、丧纪，掌其事，如大司马之法。

军司马：阙。

奥司马：阙。

行司马：阙。

司勋：掌六乡赏地之法，以等其功。王功曰勋，国功曰功，民功曰庸，事功曰劳，治功曰力，战功曰多。凡有功者，铭书于王之大常，祭于大烝，司勋诏之。大功，司勋藏其贰。掌赏地之政令，凡赏无常，轻重视功。凡颁赏地，参之一食，惟加田无国正。

马质：掌质马。马量三物，一曰戎马，二曰田马，三曰驽马，皆有物贾。纲恶马。凡受马于有司者，书其齿毛与其贾。马死，则旬之内更，旬之外入马耳，以其物更，其外否。马及行，则以任齐其行。若有马讼，则听之。禁原蚕者。

量人：掌建国之法，以分国为九州。营国城郭，营后宫，量市朝、道巷、门渠，造都邑亦如之。营军之垒舍，量其市朝、州涂、军社之所里。邦国之地与天下之涂数，皆书而藏之。凡祭祀、飨宾，制其从献脯醢之数量。掌丧祭奠竈之俎实。凡宰祭，与郁人受纼历而皆饮之。

小子：掌祭祀羞羊肆、羊骹、肉豆，而掌珥于社稷、祈于五祀。凡沉辜、侯禴，饰其牲。衅邦器及军器。凡师田，斩牲以左右徇陈。祭祀，赞羞、受彻焉。

羊人：掌羊牲。凡祭祀，饰羔。祭祀，割羊牲，登其首。凡祈珥，共其羊牲；宾客，共其法羊。凡沉、辜、侯、禴、衅、积，共其羊牲。若牧人无牲，则受布于司马，使其贾买牲而共之。

司燿：掌行火之政令，四时变国火，以救时疾。季春出火，民咸从之；季秋内火，民亦如之。时则施火令。凡祭祀，则祭燿。

凡国失火，野焚莱，则有刑罚焉。

掌固：掌修城郭、沟池、树渠之固，颁其士庶子及其众庶之守；设其饰器；分其财用，均其稍食。任其万民，用其材器。凡守者受法焉，以通守政。有移甲与其役财用，唯是得通，与国有司帅之，以赞其不足者。昼三巡之，夜亦如之。夜三鼙以号成。

若造都邑，则治其固，与其守法。凡国都之竟，有沟树之固，郊亦如之。民皆有职焉。若有山川，则因之。

司险：掌九州之图，以周知其山林、川泽之阻，而达其道路。设国之五沟五涂，而树之林以为阻固，皆有守禁而达其道路。国有故，则藩塞阻路而止行者，以其属守之，唯有节者达之。

掌疆：阙。

候人：各掌其方之道治与其禁令，以设候人。若有方治，则帅而致于朝；及归，送之于竟。

环人：掌致师，察军慝，环四方之故。巡邦国，搏谍贼。讼敌国，扬军旅，降围邑。

挈壶氏：掌挈壶以令军井，挈轡以令舍，挈釜以令粮。凡军事，县壶以序聚析，凡丧。县壶以代哭者。皆以水火守之，分以日夜。及冬，则以火爨鼎水而沸之，而沃之。

射人：掌国之三公、孤、卿、大夫之位，三公北面，孤东面，卿、大夫西面。其摯：三公执璧，孤执皮帛，卿执羔，大夫雁。诸侯在朝，则皆北面，诏相其法。若有国事，则掌其戒令，诏相其事。掌其治达。

以射法治射仪：王以六耦，射三侯，三获三容，乐以《騶虞》，九节五正；诸侯以四耦，射二侯，二获二容，乐以《狸首》，七节三正；孤、卿、大夫以三耦，射一侯，一获一容，乐以《采蘋》，五节二正；士以三耦，射豝侯，一获一容，乐以《采芣》，五节二正。若王大射，则以狸步张三侯。王射，则令去侯，立于后；以矢行告；卒，令取矢。祭侯则为位。与大夫数射中。佐司马治射正。祭祀，则赞射牲，相孤、卿、大夫之法仪。

会同、朝觐，作大夫介，凡有爵者。大师，令有爵者乘王之停车。有大宾客，则作卿大夫从，戒大史及大夫介。大丧，与仆人迁尸，作卿大夫掌事，比其庐，不敬者苛罚之。

服不氏：掌养猛兽而教扰之。凡祭祀，共猛兽。宾客之事，则抗皮。射则赞张侯，以旌居乏而待获。

射鸟氏：掌射鸟。祭祀，以弓矢驱鸟鸢；凡宾客、会同、军旅，亦如之。射则取矢；矢在侯高，则以并夹取之。

罗氏：掌罗鸟。蜡则作罗襦。中春罗春鸟，献鸛以养国老，行羽物。

掌畜：掌养鸟，而阜蕃教抚之。祭祀，共卵鸟。岁时贡鸟物，共膳献之鸟。

司士：掌群臣之版，以治其政令。岁登下其损益之数，辨其年岁与其贵贱，周知邦国、都家、县鄙之数，卿、大夫、士庶子之数，以诏王治。以德诏爵，以功诏禄，以能诏事，以久奠食，惟赐无常。

正朝仪之位，辨其贵贱之等。王南乡，三公北面东上，孤东面北上，卿大夫西面北上；王族故士、虎士在路门之右，南面东上；大仆、大右、大仆从者在路门之左，南面西上。司士摈：孤卿特揖，大夫以其等旅揖，士旁三揖，王还揖门左，揖门右。太仆前。王入，内朝皆退。

掌国中之士治，凡其戒令。掌摈士者，膳其摯。凡祭祀，掌士之戒令，诏相其法事；及赐爵，呼昭穆而进之。帅其属而割牲，羞俎豆。凡会同，作士从，宾客亦如之。作士适四方使，为介。大丧，作士掌事，作六军之士执披；凡士之有守者，令哭无去守。国有故，则致士而颁其守。凡邦国，三岁则稽士任，而进退其爵禄。

诸子：掌国子之倅，掌其戒令与其教治，辨其等，正其位。

国有大事，则帅国子而致于天子，惟所用之。若有兵甲之事，则授之车甲，合其卒伍，置其有司，以军法治之。司马弗正。凡国正，弗及。大祭祀，正六牲之体。凡乐事，正舞位，授舞器。大丧，正群子之服位。会同、宾客，作群子从。凡国之政事，国子存游倅，使之修德学道；春合诸学，秋合诸射，以考其艺而进退之。

司右：掌群右之政令。凡军旅、会同，合其车之卒伍而比其乘、属其右。凡国之勇力之士能用五兵者属焉，掌其政令。

虎贲氏：掌先后王而趋以卒伍。军旅、会同，亦如之。舍则守王闲。王在国，则守王宫。国有大故，则守王门；大丧，亦如之，及葬，从遣车而哭。适四方使，则从士大夫。若道路不通，有征事，则奉书以使于四方。

旅贲氏：掌执戈盾，夹王车而趋，左八人，右八人。车止则持轮。凡祭祀、会同、宾客，则服而趋。丧纪，则衰葛执戈盾。军旅，则介而趋。

节服氏：掌祭祀、朝觐袞冕，六人维王之（太）（大）常。——诸侯则四人，其服亦如之。——郊祀裘冕，二人执戈，送逆尸从车。

方相氏：掌蒙熊皮、黄金四目、玄衣朱裳、执戈扬盾，帅百隶而时难，以索室驱疫。大丧，先柩；及墓，入圻，以戈击四隅，驱方良。

大仆：掌正王之服位，出入王之大命。掌诸侯之复逆。王视朝，则前正位而退，入亦如之。建路鼓于大寝之门外而掌其政，以待达穷者与遽令；闻鼓声，则速逆御仆与御庶子。祭祀、宾客、丧纪，正王之服位，诏法仪，赞王牲事。王出入，则自左馭面前驱。凡军旅、田役，赞王鼓；救日月，亦如之。大丧，始崩，戒鼓传达于四方，窆亦如之。县丧道服之法于宫门。掌三公、孤卿之吊劳。王燕饮，则相其法。王射，则赞弓矢。王视燕朝，则正位，掌擦相。王不视朝，则辞于三公及孤卿。

小臣：掌王之小命，诏相王之小法仪。掌三公及孤卿之复逆，正王之燕服位。王之燕出入，则前驱。大祭祀、朝觐，沃王盥。小祭祀、宾客、飧食、宾射，掌事如大仆之法。掌士大夫之吊劳。凡大事，佐大仆。

祭仆：掌受命于王，以视祭祀，而警戒祭祀有司，纠百官之戒具。既祭，帅群有司而反命；以王命劳之，诛其不敬者。大丧，复于小庙。凡祭祀，王之所不存，则赐之禽，都家亦如之。凡祭祀致福者，展而受之。

御仆：掌群吏之逆及庶民之复，与其吊劳。大祭祀，相盥而登。大丧，持翣。掌王之燕

令，以序守路鼓。

隶仆：掌五寝之扫除粪洒之事。祭祀，修寝。王行，洗乘石。

掌辟宫中之事。大丧，复于小寝、大寝。

弁师：掌王之五冕，皆玄冕、朱里、延、纽、五采纁十有二就，皆五采玉十有二，玉笋朱紘。诸侯之纁旒九就，璫玉三采，其余如王之事；纁旒皆就，玉璫玉笋。王之皮弁，会五采玉璫，象邸玉笋。王之弁纁，弁而加环纁。诸侯及孤卿大夫之冕、韦弁、皮弁、弁纁，各以其等为之，而掌其禁令。

司甲：阙。

司兵：掌五兵五盾，各辨其物与其等，以待军事。及授兵，从司马之法以颁之。及其受兵输，亦如之。及其用兵，亦如之。

祭祀，授舞者兵。大丧，廋五兵。军事，建车之五兵，会同亦如之。

司戈盾：掌戈盾之物而颁之。祭祀，授旅賁戈、故士戈盾；授舞者兵亦如之。军旅、会同，授贰车戈盾，建乘车之戈盾，授旅賁及虎士戈盾。及舍，设藩盾，行则敛之。

司弓矢：掌六弓四弩八矢之法，辨其名物，而掌其守藏与其出入。中春献弓弩，中秋献矢箛。及其颁之：王弓、孤弓，以授射甲革、楛质者；夹弓、庚弓，以授射豸侯、鸟兽者；唐弓、大弓，以授学射者、使者、劳者。其矢箛皆从其弓。凡弩，夹、庚利攻守，唐、大利车战、野战。凡矢，枉矢、絜矢利火射，用诸守城、车战；杀矢、鏃矢用诸近射、田猎；矰矢、弗矢用诸戈射；恒矢、（痺）（庠）矢用诸散射。天子之弓合九而成规，诸侯合七而成规，大夫合五而成规，士合三而成规；句者谓之弊弓。凡祭祀，共射牲之弓矢。泽，共射楛质之弓矢。大射、燕射，共弓矢如数并夹。大丧，共明弓矢。凡师役、会同，颁弓弩各以其物，从授兵（至）（甲）之仪。田戈，充箛箛矢，共矰矢。凡亡矢者，弗用则更。

缮人：掌王之用弓弩、矢箛、矰戈、抉拾，掌诏王射，赞王弓矢之事。凡乘车，充其箛箛，载其弓弩。既射，则敛之，无会计。

（稟）（稿）人：掌受财于职金，以赏其工。弓六物为三等，弩四物亦如之。矢八物皆三等，箛亦如之。春献素，秋献成。书其等以飨工。乘其事，试其弓弩，以下上其食而诛赏。乃入功于司弓矢及缮人。凡赏财与其出入，皆在（稟）（稿）人，以待会而考之，亡者阙之。

戎右：掌戎车之兵革使，诏赞王鼓，传王命于陈中。会同，充革车。盟，则以玉敦辟盟，遂役之。赞牛耳、桃茢。

齐右：掌祭祀、会同、宾客前齐车，王乘则持马，行则陪乘。

凡有牲事，则前马。

道右：掌前道车。王出入，则持马陪乘，如齐车之仪。自车上谕命于从车，诏王之车仪。王式，则下前马；王下，则以盖从。

大驭：掌驭玉路以祀。及犯軼，王自左驭；驭下祝，登受轡，犯軼，遂驱之。及祭，酌仆；仆左执轡，右祭两轡，祭軼，乃饮，凡驭路，行以《肆夏》，趋以《采芣》。凡驭路仪，以鸾和为节。

戎仆：掌驭戎车。掌王倅车之政，正其服。犯軼，如玉路之仪。凡巡守及兵车之会亦如之。掌凡戎车之仪。

齐仆：掌驭金路以宾。朝觐、宗遇、飧食，皆乘金路，其法仪各以其等为车送逆之节。

道仆：掌驭象路，以朝夕、燕出入，其法仪如齐车。掌贰车之政令。

田仆：掌驭田路，以田以鄙。掌佐车之政，设驱道之车。令获者植旌，及献比禽。凡田，王提马而走，诸侯晋，大夫驰。

驭夫：掌驭贰车、从车、使车，分公马而驾治之。

校人：掌王马之政。辨六马之属，种马一物，戎马一物，齐马一物，道马一物，田马一物，弩马一物。凡颁良马而养乘之：乘马一师四围，三乘为皂，皂一趣马；三皂为系，系一

驭夫：六系为厩，厩一仆夫；六厩成校，校有左右。驾马三良马之数；丽马一圉，（八）（六）丽一师；（八）（六）师一趣马，（八）（六）趣马一驭夫。天子十有二闲，马六种；邦国六闲，马四种；家四闲，马二种。凡马，特居四之一。春祭马祖，执驹；夏祭先牧，颁马攻特；秋祭马社，臧仆；冬祭马步，献马，讲驭夫。凡大祭祀、朝觐、会同，毛马而颁之。饰币马，执扑而从之。凡宾客，受其币马。

大丧，饰遣车之马；及葬，埋之。田猎，则帅驱逆之车。凡将事于四海、山川，则饰黄驹。凡国之使者，共其币马。凡军事，物马而颁之。等驭夫之禄、宫中之稍食。

趣马：掌赞正良马，而齐其饮食，简其六节。掌驾说之颁。

辨四时之居治，以听驭夫。

巫马：掌养疾马而乘治之，相医而药攻马疾，受财于校人。

马死，则使其贾粥之，入其布于校人。

牧师：掌牧地，皆有厉禁而颁之。孟春焚牧，中春通淫，掌其政令。凡田事，赞焚莱。

庾人：掌十有二闲之政教，以阜马、佚特、教駟、攻驹，及祭马祖、祭闲之先牧，及执驹、散马耳、圉马。正校人员选。马八尺以上为龙，七尺以上为驂，六尺以上为马。

圉师：掌教圉人养马。春除蓐，衅厩，始牧；夏厉马；冬献马。射则充楮质，茨墙则翦鬣。

圉人：掌养马刍牧之事，以役圉师。凡宾客、丧纪，牵马而入陈。廐马亦如之。

职方氏：掌天下之图，以掌天下之地。辨其邦国、都鄙、四夷、八蛮、七闽、九貉、五戎、六狄之人民，与其财用、九谷、六畜之数要，周知其利害。

乃辨九州之国，使同贯利：东南曰扬州，其山镇曰会稽，其泽薮曰具区，其川三江，其浸五湖，其利金、锡、竹、箭，其民二男五女，其畜宜鸟兽，其谷宜稻。正南曰荊州，其山镇曰衡山，其泽薮曰云梦，其川江、汉，其浸颖、湛，其利丹、银、齿、革、其民一男二女，其畜宜鸟兽，其谷宜稻。河南曰豫州，其山镇曰华山，其泽薮曰圃田，其川荻、洛，其浸波、陂，其利林、漆、丝、枲，其民二男三女，其畜宜六扰，其谷宜五种。正东曰青州，其山镇曰沂山，其泽薮曰望诸，其川淮、泗，其浸沂、沭，其利蒲、鱼，其民二男二女，其畜宜鸡、狗，其谷宜稻、麦。河东曰兖州，其山镇曰岱山，其泽薮曰大野，其川河、洙，其浸庐、维，其利蒲、鱼，其民二男三女，其畜宜六扰，其谷室四种。正西曰雍州，其山镇曰岳山，其泽薮曰弦蒲，其川泾、汭，其浸渭、洛，其利玉石，其民三男二女，其畜宜牛、马，其谷宜黍、稷。东北曰幽州，其山镇曰医无闾，其泽薮曰貍养，其川河、洙，其浸菑、时，其利鱼、盐，其民一男三女，其畜宜四扰，其谷宜三种。河内曰冀州，其山镇曰霍山，其泽薮曰杨纁，其川漳，其浸汾、潞，其利松、柏，其民五男三女，其畜宜牛、羊，其谷宜黍、稷。正北曰并州，其山镇曰恒山，其泽薮曰昭馮祁，其川虡池、呕夷，其浸涿、易，其利布帛，其民二男三女，其畜宜五扰，其谷宜五种。

乃辨九服之邦国，方千里曰王畿，其外方五百里曰侯服，又其外方五百里曰甸服，又其外方五百里曰男服，又其外方五百里曰采服，又其外方五百里曰卫服，又其外方五百里曰蛮服，又其外方五百里曰夷服，又其外方五百里曰镇服，又其外方五百里曰藩服。

凡邦国千里，封公以方五百里，则四公；方四百里，则六侯；方三百里，则（七）（十一）伯；方二百里，则二十五子；方百里，则百男。以周知天下。凡邦国，小大相维。王设其牧，制其职，各以其所能；制其贡，各以其所有。王将巡守，则戒于四方，曰：“各修平乃守。考乃职事，无敢不敬戒，国有大刑！”及王之所行，先道，帅其属而巡戒令。王殷国亦如之。

土方氏：掌上圭之法，以致日景，以土地相宅，而建邦国都鄙。以辨土宜土化之法，而授任地者。王巡守，则树王舍。

怀方氏：掌来远方之民，致方贡，致远物，而送逆之，达之以节。治其委积、馆舍、饮



食。

合方氏：掌达天下之道路，通其财利，同其数器，壹其度量，除其怨恶，同其好善。

训方氏：掌道四方之政事与其上下之志，诵四方之传道。

正岁则布而训四方，而观新物。

形方氏：掌制邦国之地域，而正其封疆，无有华离之地。使小国事大国，大国比小国。

山师：掌山林之名，辨其物与其利害，而颁之于邦国，使致其珍异之物。

川师：掌川泽之名，辨其物与其利害，而颁之于邦国，使致其珍异之物。

原师：掌四方之地名，辨其丘陵、坟衍、原隰之名物之可以封邑者。

匡人：掌达法则，匡邦国而观其愿，使无敢反侧，以听王命。

撝人：掌诵王志，道国之政事，以巡天下之邦国而语之；使万民和说而正王面。

都司马：掌都之士庶子及其众庶、车马、兵甲之戒令。以国法掌其政学，以听〔于〕国司马。家司马亦如之。

## 秋官司寇第五

惟王建国，辨方正位，体国经野，设官分职，以为民极。乃立秋官司寇，使帅其属而掌邦禁，以佐王刑邦国。刑官之属：大司寇，卿一人。小司寇，中大夫二人。士师，下大夫四人。

乡士，上士八人，中士十有六人，旅下士三十有二人。府六人，史十有二人，胥十有二人，徒百有二十人。

遂士：中士十有二人。府六人，史十有二人，胥十有二人，徒百有二十人。

县士：中士三十有二人。府八人，史十有六人，胥十有六人，徒百有六十人。

方士：中士十有六人。府八人，史十有六人，胥十有六人，徒百有六十人。

讶士：中士八人。府四人，史八人，胥六人，徒八十人。

朝士：中士六人。府三人，史六人，胥六人，徒六十人。

司民：中士六人。府三人，史六人，胥三人，徒三十人。

司刑：中士二人。府一人，史二人，胥二人，徒二十人。

司刺：下士二人。府一人，史二人，徒四人。

司约：下士二人。府一人，史二人，徒四人。

司盟：下士二人。府一人，史二人，徒四人。

职金：上士二人，下士四人。府二人，史四人，胥八人，徒八十人。

司厉：下士二人。史一人，徒十有二人。

犬人：下士二人。府一人，史二人，贾四人，徒十有六人。

司圜：中士六人，下士十有二人。府三人，史六人，胥十有六人，徒百有六十人。

掌囚：下士十有二人。府六人，史十有二人，徒百有二十人。

掌戮：下士二人。史一人，徒十有二人。

司隶：中士二人，下士十有二人。府五人，史十人，胥二十人，徒二百人。

罪隶：百有二十人。

蛮隶：百有二十人。

闽隶：百有二十人。

夷隶：百有二十人。

貉隶：百有二十人。

布宪：中士二人，下士四人。府二人，史四人，胥四人，徒四十人。

禁杀戮：下士二人。史一人，徒十有二人。

禁暴氏：下士六人。史三人，胥六人，徒六十人。

野庐氏：下士六人。胥十有二人，徒百有二十人。

蜡氏：下士四人。徒四十人。

雍氏：下士二人。徒八人。

萍氏：下士二人。徒八人。

司寤氏：下士二人。徒八人。

司烜氏：下士六人。徒十有（六）〔二〕人。

条狼氏：下士六人。胥六人，徒六十人。

修闾氏：下士二人。史一人，徒十有二人。

冥氏：下士二人。徒八人。

庶氏：下士一人。徒四人。

穴氏：下士一人。徒四人。

翬氏：下士二人。徒八人。

柞氏：下士八人。徒二十人。

薙氏：下士二人。徒二十人。

翦族氏：下士一人。徒二人。

翦氏：下士一人。徒二人。

赤龙氏：下士一人。徒二人。

蜎氏：下士一人。徒二人。

壶涿氏：下士一人。徒二人。

庭氏：下士一人。徒二人。

銜枚氏：下士二人。徒八人。

伊耆氏：下士一人。徒二人。

大行人，中大夫二人。小行人，下大夫四人。司仪：上士八人，中士十有六人。行夫，下士三十有二人。府四人，史八人，胥八人，徒八十人。

环人：中士四人。史四人，胥四人，徒四十人。

象胥：每翟上士一人，中士二人，下士八人，徒二十人。

掌客：上士二人，下士四人。府一人，史二人，胥二人，徒二十人。

掌讶：中士八人。府二人，史四人，胥四人，徒四十人。

掌交：中士八人。府二人，史四人，徒三十有二人。

掌察：四方中士八人；史四人，徒十有六人。

掌货贿：下士十有六人。史四人，徒三十有二人。

朝大夫：每国上士二人，下士四人；府一人，史二人，庶子八人，徒二十人。都则中士一人，下士二人；府一人，史二人，庶子四人，徒八十人。

都士：中士二人，下士四人；府二人，史四人，胥四人，徒四十人。家士亦如之。

大司寇之职：掌建邦之三典，以佐王刑邦国、诰四方：一曰刑新国用轻典，二曰刑平国用中典，三曰刑乱国用重典。

以五刑纠万民：一曰野刑，上功纠力；二曰军刑，上命纠守；三曰乡刑，上德纠孝；四曰官刑，上能纠职；五曰国刑，上愿纠暴。以圜土聚教罢民，凡害人者，置之圜土而施职事焉，以明刑耻之。其能改者，反于中国，不齿三年。其不能改而出圜土者，杀。以两造禁民讼，入束矢于朝，然后听之。以两剂禁民狱，入钧金，三日乃致于朝，然后听之。以嘉石平罢民，凡万民之有罪过而未丽于法而害于州里者，桎梏而坐诸嘉石，役诸司空：重罪，旬有三日坐，期役；其次九日坐，九月役；其次七日坐，七月役；其次五日坐，五月役；其下罪三日坐，三月役；使州里任之，则宥而舍之。以肺石达穷民，凡远近独老幼之欲有复于上而其长弗达者，立于肺石三日，士听其辞，以告于上而罪其长。

正月之吉，始和布刑于邦国都鄙，乃县刑象之法于象魏，使万民观刑象，挟日而敛之。凡邦之大盟约，莅其盟书而登之于天府；大史、内史、司会及六官皆受其贰而藏之。凡诸侯之狱讼，以邦典定之。凡卿大夫之狱讼，以邦法断之。凡庶民之狱讼，以邦成弊之。

大祭祀，奉犬牲。若禋祀五帝，则戒之日，莅誓百官，戒于百族。及纳亨，前王，祭之日亦如之。奉其明水火。

凡朝觐、会同，前王；大丧亦如之。大军旅，莅戮于社。凡邦之大事，使其属蹕。

小司寇之职：掌外朝之政，以致万民而询焉，一曰询国危，二曰询国迁，三曰询立君。其位：王南乡，三公及州长、百姓北面，群臣西面，群吏东面。小司寇摈以叙进而问焉，以众辅志而弊谋。

以五刑听万民之狱讼，附于刑，用情讯之；至于旬乃弊之，读书则用法。凡命夫命妇，不躬坐狱讼。凡王之同族有罪，不即市。

以五声听狱讼，求民情：一曰辞听，二曰色听，三曰气听，四曰耳听，五曰目听。

以八辟丽邦法，附刑罚：一曰议亲之辟，二曰议故之辟，三曰议贤之辟，四曰议能之辟，五曰议功之辟，六曰议贵之辟，七曰议勤之辟，八曰议宾之辟。

以三刺断庶民狱讼之中：一曰讯群臣，二曰讯群吏，三曰讯万民。听民之所刺宥，以施上服、下服之刑。

及大比，登民数，自生齿以上登于天府。内史、司会、冢宰贰之，以制国用。

小祭祀，奉犬牲。凡禋祀五帝，实饗水，纳亨亦如之。大宾客，前王而辟，后、世子之丧亦如之。小师，莅戮。凡国之大事，使其属蹕。

孟冬祀司民，献民数于王，王拜受之，以图国用而进退之。

岁终，则令群士计狱弊讼，登中于天府。正岁帅其属而观刑象，令以木铎，曰：“不用法者，国有常刑！”令群士，乃宣布于四方，宪刑禁。乃命其属入会，乃致事。

士师之职：掌国之五禁之法，以左右刑罚：一曰宫禁，二曰官禁，三曰国禁，四曰野禁，五曰军禁。皆以木铎徇之于朝，书而县于门闾。

以五戒先后刑罚，毋使罪丽于民：一曰誓，用之于军旅；二曰诰，用之于会同；三曰禁，用诸田役；四曰纠，用诸国中；五曰宪，用诸都鄙。

掌乡合州党族闾比之联与其民人之什伍，使之相安相受，以比追胥之事，以施刑罚庆赏。掌官中之政令。察狱讼之辞，以诏司寇断狱弊讼，致邦令。

掌士之八成，一曰邦沟，二曰邦贼，三曰邦谍，四曰犯邦令，五曰挐邦令，六曰为邦盗，七曰为邦朋，八曰为邦诬。

若邦凶荒，则以荒辩之法治之。令移民、通财，纠守、缓刑。

凡以财狱讼者，正之以傅别、约剂。若祭胜国之社稷，则为之尸。王燕出入，则前驱而辟。祀五帝，则沃尸及王盥，泊饗水。

凡刳珥，则奉犬牲。诸侯为宾，则帅其属而蹕于王宫；大丧亦如之。大师，帅其属而禁逆军旅者与犯师禁者，而戮之。

岁终，则令正要会。正岁帅其属而宪禁令于国，及郊野。

乡士：掌国中。各掌其乡之民数而纠戒之。听其狱讼，察其辞。辨其狱讼，异其死刑之罪而要之，旬而职听于朝。司寇听之，断其狱、弊其讼于朝；群士司刑皆在，各丽其法以议狱讼。狱讼成，士师受中；协日刑杀，肆之三日。若欲免之，则王会其期。大祭祀、大丧纪、大军旅、大宾客，则各掌其乡之禁令，帅其属夹道而蹕。三公若有邦事，则为之前驱而辟，其丧亦如之。凡国有大事，则戮其犯命者。

遂士：掌四郊。各掌其遂之民数，而纠其戒令。听其狱讼，察其辞。辨其狱讼，异其死财之罪而要之，二旬而职听于朝。司寇听之，断其狱，弊其讼于朝；群士司刑皆在，各丽其法以议狱讼。狱讼成，士师受中；协日就郊而刑杀，各于其遂肆之三日。

若欲免之，则王令三公会其期。若邦有大事，聚众庶，则各掌其遂之禁令，帅其属而辟。六卿若有邦事，则为之前驱而辟，其丧亦如之。凡郊有大事，则戮其犯命者。

县士：掌野。各掌其县之民数，纠其戒令而听其狱讼，察其辞。辨其狱讼，异其死刑之罪而要之，三旬而职听于朝。司寇听之，断其狱，弊其讼于朝。群士司刑皆在，各丽其法以议狱讼。狱讼成，士师受中；协日刑杀，各就其县肆之三日。若欲免之，则王命六卿会其期。若邦有大役，聚众庶，则各掌其县之禁令。若大夫有邦事，则为之前驱而辟，其丧亦如之。凡野有大事，则戮其犯命者。

方士：掌都家。听其狱讼之辞，辨其死刑之罪而要之，三月而上狱讼于国。司寇听其成于朝，群士司刑皆在，各丽其法以议狱讼。狱讼成，士师受中，书其刑杀之成与其听狱讼者。凡都家之大事，聚众庶，则各掌其方之禁令。以时修其县法，若岁终，则省之而诛赏焉。凡都家之士所上治，则主之。

诒士：掌四方之狱讼，谕罪刑于邦国。凡四方之有治于士者，造焉。四方有乱狱，则往而成之。邦有宾客，则与行人送逆之。入于国，则为之前驱而辟，野亦如之。居馆，则帅其属而为之辟，诛戮暴客者。客出入则道之，有治则赞之。凡邦之大事，聚众庶，则读其誓禁。

朝士：掌建邦外朝之法。左九棘，孤、卿、大夫位焉，群士在其后；右九棘，公、侯、伯、子、男位焉，群吏在其后；面三槐，三公位焉，州长众庶在其后；左嘉石，平罢民焉；右肺石，达穷民焉。帅其属而以鞭呼、趋且辟。禁慢朝、错立族谈者。凡得获货贿、人民、六畜者，委于朝，告于士，旬丽举之：大者公之，小者庶民私之。凡士之治有期日：国中一句，郊二句，野三句，都三月，邦国期。期内之治听，期外不听。凡有责者，有判书以治，则听。凡民同货财者，令以国法行之；犯令者，刑罚之。凡属责者，以其地傅而听其辞。凡盗贼军乡邑及家人，杀之无罪。凡报仇雠者，书于士，杀之无罪。若邦凶荒、札丧、寇戎之故，则令邦国、都家、县鄙虑刑贬。

司民：掌登万民之数。自生齿以上，皆书于版。辨其国中与其都鄙及其郊野，异其男女。岁登下其死生。及三年大比，以万民之数诏司寇。司寇及孟冬祀司民之日，献其数于王；王拜受之，登于天府；内史、司会、冢宰贰之，以赞王治。

司刑：掌五刑之法以丽万民之罪，墨罪五百，劓罪五百，宫罪五百，刖罪五百，杀罪五百。若司寇断狱弊讼，则以五刑之法诏刑罚，而以辨罪之轻重。

司刺：掌三刺、三宥、三赦之法，以赞司寇听狱讼。壹刺曰讯群臣，再刺曰讯群吏，三刺曰讯万民。壹宥曰不识，再宥曰过失，三宥曰遗忘。壹赦曰幼弱，再赦曰老耄，三赦曰蠢愚。以此三法者求民情，断民中，而施上服、下服之罪，然后刑杀。

司约：掌邦国及万民之约剂。治神之约为上，治民之约次之，治地之约次之，治功之约次之，治器之约次之，治挚之约次之。凡大约剂书于宗彝，小约剂书于丹图。若有讼者，则珥而辟藏，其不信者服墨刑。若大乱，则六官辟藏，其不信者杀。

司盟：掌盟载之法。凡邦国有疑会同，则掌其盟约之载及其礼仪，北面诏明神，既盟，则贰之。盟万民之犯命者，诅其不信者亦如之。凡民之有约剂者，其贰在司盟；有狱讼者，则使之盟诅。凡盟诅，各以其地域之众庶，共其牲而致焉；既盟，则为司盟共祈酒脯。

职金：掌凡金玉、锡石、丹青之戒令。受其入征者，辨其物之嫩恶与其数量，楬而玺之。入其金锡于为兵器之府，入其玉石、丹青于守藏之府，入其要。掌受士之金罚、货罚，入于司兵。

旅于上帝，则共其金版，飨诸侯亦如之。凡国有大故而用金石，则掌其令。

司厉：掌盗贼之任器、货贿。辨其物，皆有数量，贾而楬之，入于司兵。其奴，男子入于罪隶，女子入于舂、槁。凡有爵者与七十者与未龀者，皆不为奴。

犬人：掌犬牲。凡祭祀，共犬牲，用牲物，伏、瘞亦如之。凡凡、珥、沉、辜，用騂可也。凡相犬、牵犬者属焉，掌其政治。

司圜：掌收教罢民。凡害人者弗使冠饰，而加明刑焉，任之以事而收教之。能改者，上罪三年而舍，中罪二年而舍，下罪一年而舍。其不能改而出圜土者，杀；虽出，三年不齿。凡圜土之刑人也，不亏体；其罚人也，不亏财。

掌囚：掌守盗贼凡囚者，——上罪桎梏而桎，中罪桎梏，下罪桎，王之同族桎，有爵者桎，——以待弊罪。及刑杀，告刑于王，奉而适朝士；加明桎，以适市而刑杀之。凡有爵者与王之同族，奉而适甸师氏，以待刑杀。

掌戮：掌斩杀贼谍而搏之。凡杀其亲者，焚之；杀王之亲者，辜之。凡杀人者，踣诸市，肆之三日。刑盗于市。凡罪之丽于法者，亦如之。唯王之同族与有爵者，杀之于甸师氏。凡军旅、田役，斩杀、刑戮亦如之。墨者使守门，劓者使守关，宫者使守内，刖者使守圉，髡者使守积。

司隶：掌五隶之法，辨其物而掌其政令。帅其民而搏盗贼，役国中之辱事，为百官积任器，凡囚执人之事。邦有祭祀、宾客、丧纪之事，则役其烦辱之事。掌帅四翟之隶，使之皆服其邦之服，执其邦之兵，守王宫与野舍之厉禁。

罪隶：掌役百官府与凡有守者，掌使令之小事。凡封国若家，（牛助为牵傍。其守王宫与其厉禁者，如蛮隶之事。）〔子则取隶焉。〕蛮隶：掌役校人，养马。其在王宫者，执其国之兵以守王宫；在野外，则守厉禁。

圉隶：掌役〔掌〕畜，养鸟，而阜蕃教执之。掌〔子则取隶焉。〕〔与鸟言。其守王宫者与其守厉禁者如蛮隶之事。〕夷隶：掌役牧人，养牛〔马，与鸟言〕，〔助为牵傍。〕其守王宫者与其守厉禁者，如蛮隶之事。

貉隶：掌役服不氏，〔而〕养兽，而教扰之。掌与兽言。其守王宫者与其守厉禁者，如蛮隶之事。

布宪：掌宪邦之刑禁。正月之吉，执旌节以宣布于四方；而宪邦之刑禁以诒四方邦国及其都鄙，达于四海。凡邦之众庶，则以刑禁号令。

禁杀戮：掌司斩杀戮者、凡伤人见血而不以告者、攘狱者、遏讼者，以告而诛之。

禁暴氏：掌禁庶民之乱暴力正者、矫诬犯禁者、作言语而不信者，以告而诛之。凡国聚众庶，则戮其犯禁者以徇。凡奚隶聚而出入者，则司牧之，戮其犯禁者。

野庐氏：掌达国道路，至于四畿；比国郊及野之道路、宿息、井、树。若有宾客，则令守涂地之人聚柝之，有相翔者〔则〕诛之。凡道路之舟车輶互者，叙而行之。凡有节者及有爵者至，则为之辟。禁野之横行径逾者。凡国之大事，比修除道路者。

掌凡道禁。邦之〔有〕大师，则令扫道路，且以畿禁行作不时者、不物者。

蜡氏：掌除骺。凡国之大祭祀，令州里除不蠲，禁刑者、任人及凶服者，以及郊野；大师、大宾客，亦如之。若有死于道路者，则令埋而置楬焉，书其日月焉，县其衣服、任器于有地之官，以待其人。掌凡国之骺禁。

雍氏：掌沟渎浚池之禁，凡害于国稼者。春令为阱攫沟渎之利于民者，秋令塞阱杜攫。禁山之苑、泽之沉者。

萍氏：掌国之水禁。畿酒，谨酒。禁川游者。

司寤氏：掌夜时。以星分夜，以诏夜士夜禁。御晨行者，禁宵行者、夜游者。

司烜氏：掌以夫遂取明火于日，以鉴取明水于月，以共祭祀之明粢、明烛，共明水。凡邦之大事，共坎烛庭燎。中春以木铎修火禁于国中。军旅，修火禁。邦若屋诛，则为明竈焉。

条狼氏：掌执鞭以趋辟。王出入，则八人夹道，公则六人，侯伯则四人，子男则二人。凡誓，执鞭以趋于前，且命之。誓仆右曰“杀”，誓驭曰“车轘”，誓大夫曰“敢不关，鞭五百”，誓师曰“三百”，誓邦之大史曰“杀”，誓小史曰“墨”。

修闾氏：掌比国中宿互柝者与其国粥，而比其追胥者而赏罚之。禁径逾者与以兵革趋行者，与驰骋于国中者。邦有故，则令守其间互，唯执节者不畿。

冥氏：掌设弧张。为阱攫以攻猛兽，以灵鼓驱之。若得其兽，则献其应、革、齿、须、备。

庶氏：掌除毒蛊，以攻说祲之，以嘉草攻之。凡驱蛊，则令之比之。

穴氏：掌攻蛰兽，各以其物火之。以时献其珍异皮革。

翬氏：掌攻猛鸟，各以其物为媒而擒之。以时献其羽翮。

柞氏：掌攻草木及林麓。夏日至，令刊阳木而火之。冬日至，令剥阴木而水之。若欲其化也，则春秋变其水火。凡攻木者，掌其政令。

薙氏：掌杀草。春始生而萌之，夏日至而夷之，秋绳而芟之，冬日至而耜之。若欲其化也，则以水火变之。掌凡杀草之政令。

翬族氏：掌覆夭鸟之巢。以方书十日之号、十有二辰之号、十有二月之号、十有二岁之号、二十有八星之号，县其巢上，则去之。

翦氏：掌除蠹物，一一以攻荼攻之，以莽草熏之，一一凡庶蛊之事。

赤发氏：掌除墙屋，以蜃炭攻之，以灰洒毒之。凡隙屋，除其狸虫。

蜎氏：掌去蛙黾，焚牡鞠。以灰洒之，则死。以其烟被之，则凡水虫无声。

壶涿氏：掌除水虫。以炮土之鼓驱之，以焚石投之。若欲杀其神，则以牡槀午贯象齿而沉之，则其神死，渊为陵。

庭氏：掌射国中之夭鸟。若不见其鸟兽，则以救日之弓与救月之矢（夜）射之。若神也，则以大阴之弓与枉矢射之。

衔枚氏：掌司噤。国之大祭祀，令禁无噤。军旅、田役，命衔枚。禁叫呼吸鸣于国中者、行歌哭于国中之道者。

伊耆氏：掌国之大祭祀，共其杖咸。军旅，授有爵者杖。共王之齿杖。

大行人：掌大宾之礼及大客之仪，以亲诸侯。春朝诸侯而图天下之事，秋覲以比邦国之功，夏宗以陈天下之谟，冬遇以协诸侯之虑。时会以发四方之禁，殷同以施天下之政；时聘以结诸侯之好，殷覲以除邦国之慝；间问以谕诸侯之志，归弔以交诸侯之福，贺庆以赞诸侯之喜，致禋以补诸侯之灾。

以九仪辨诸侯之命，等诸臣之爵，以同邦国之礼而待其宾客。上公之礼：执桓圭九寸，纁藉九寸，冕服九章，建常九旒，樊纁九就，贰车九乘，介九人，礼九牢；其朝位，宾主之间九十步，立当车轂；摈者五人；庙中将币，三享。王礼再裸而酢，飧礼九献，食礼九举，出入五积，三问三劳。诸侯之礼：执信圭七寸，纁藉七寸，冕服七章，建常七旒，樊纁七就，贰车七乘，介七人，礼七牢；朝位，宾主之间七十步，立当前疾；摈者四人；庙中将币，三享。王礼壹裸而酢，飧礼七献，食礼七举，出入四积，再问再劳。诸伯执躬圭，其他皆如诸侯之礼。诸子：执谷璧五寸，纁藉五寸，冕服五章，建常五旒，樊纁五就，贰车五乘，介五人，礼五牢；朝位，宾主之间五十步，立当车衡；摈者三人；庙中将币，三享。王礼壹裸不酢，飧礼五献，食礼五举，出入三积，壹问壹劳。

诸男执蒲璧，其他皆如诸子之礼。

凡大国之孤，执皮帛以继小国之君。出入三积，不问，壹劳。朝位当车前。不交摈，庙中无相。以酒礼之。其他皆视小国之君。凡诸侯之卿，其礼各下其君二等以下；及其大夫、士，皆如之。

邦畿方千里。其外方五百里谓之侯服，岁壹见，其贡祀物。

又其外方五百里谓之甸服，二岁壹见，其贡嫔物。又其外方五百里谓之男服，三岁壹见，其贡器物。又其外方五百里谓之采服，四岁壹见，其贡服物。又其外方五百里谓之卫服，五岁壹见，其贡材物。又其外方五百里谓之要服，六岁壹见，其贡货物。九州之外谓之蕃国，世壹见，各以其所贵宝为挚。

王之所以抚邦国诸侯者，岁遍存，三岁遍覲，五岁遍省，七岁属象胥、谕言语、协辞命，

九岁属瞽史、谕书名、听声音，十有一岁达瑞节、同度量、成家礼、同数器、修法则，十有二岁王巡守、殷国。

凡诸侯之王事，辨其位，正其等，协其礼，宾而见之。若有大丧，则诏相诸侯之礼。若有四方之大事，则受其币，听其辞。

凡诸侯之邦交，岁相问也，殷相聘也，世相朝也。

小行人：掌邦国宾客之礼籍，以待四方之使者。令诸侯春入贡，秋献功；王亲受之，各以其国之籍礼之。凡诸侯入王，则逆劳于畿。及郊劳、视馆、将币，为承而摈。凡四方之使者，大客则摈，小客则受其币而听其辞。

使适四方，协九仪宾客之礼。朝、觐、宗、遇、会、同，君之礼也。存、覲、省、聘、问，臣之礼也。

达天下之六节：山国用虎节，土国用人节，泽国用龙节，皆以金为之。道路用旌节，门关用符节，都鄙用管节，皆以竹为之。

成六瑞：王用珌圭，公用桓圭，侯用信圭，伯用躬圭，子用谷璧，男用蒲璧。

合六币：圭以马，璋以皮，璧以帛，琮以锦，琥以绣，璜以黼。此六物者，以和诸侯之好故。

若国札丧，则令赙补之。若国凶荒，则令赙委之。若国师役，则令槁祔之。若国有福事，则令庆贺之。若国有祸灾，则令哀吊之。凡此五物者，治其事故。

及其万民之利害为一书，其礼俗、政事、教治、刑禁之逆顺为一书，其悖逆、暴乱、作愿、犹犯令者为一书，其札丧、凶荒、厄贫为一书，其康乐、和亲、安平为一书。凡此五物者，每国辨异之，以反命于王，以周知天下之故。

司仪：掌九仪之宾客摈相之礼，以诏仪容、辞令、揖让之节。

将合诸侯，则令为坛三成，宫，旁一门。诏王仪：南乡见诸侯，土揖庶姓，时揖异姓，天揖同姓。及其摈之，各以其礼：公于上等，侯伯于中等，子男于下等。其将币亦如之，其礼亦如之。

王燕，则诸侯毛。

凡诸公相为宾：主国五积，三问；皆三辞，拜受；皆旅摈；再劳；三辞，三揖；登；拜受，拜送。主君郊劳；交摈，三辞；车逆，拜辱；三揖，三辞；拜受；车送，三还；再拜。致馆亦如之。致飧，如致积之礼。及将币，交摈，三辞；车逆，拜辱；宾车进，答拜；三揖，三让；每门止一相，及庙，唯上相入；宾三揖三让；登，再拜授币；宾拜送币。——每事如初，宾亦如之。——及出，车送，三请三进，再拜；宾三还三辞，告辟。致饔飧，还圭，飧食，致赠，郊送，皆如将币之仪。宾之拜礼，拜饔飧，拜飧食。宾继主君，皆如主国之礼。诸侯、诸伯、诸子、诸男之相为宾也，各以其礼；相待也，如诸公之仪。

诸公之臣相为国客，则三积，皆三辞，拜受。及大夫郊劳，旅摈，三辞，拜辱；三让，登，听命；下拜，登受；宾使者，如初之仪；及退，拜送。致馆，如初之仪。及将币，旅摈，三辞；拜逆，客辟；三揖；每门止一相，及庙，唯君相入；三让，客登；拜，客三辟；授币，下出。每事如初之仪。及礼，私面，私献，皆再拜稽首，君答拜；出，及中门之外，问君；客再拜，对；君拜，客辟而对；君问大夫，客对；君劳客，客再拜稽首；君答拜，客趋辟。致饔飧，如劳之礼。飧食，还圭，如将币之仪。君馆客，客辟，介受命；遂送，客从拜辱于朝。明日，客拜礼赐，遂行，如入之积。凡（诸）（侯）伯子男之臣，以其国之爵相为客而相礼，其仪亦如之。

凡四方之宾客，礼仪、辞命、饔牢、赐献以二等从其爵而上下之。凡宾客，送逆同礼。凡诸侯之交，各称其邦而为之币，以其币为之礼。

凡行人之仪，不朝不夕，不正其主面，亦不背客。

行夫：掌邦国传遽之小事、媿恶而无礼者。凡其使也，必以旌节。虽道有难而不时，必

达。居于其国，则掌行人之劳辱事焉；使则介之。

环人：掌送逆邦国之通宾客，以路节达诸四方。舍则授馆，令聚柝；有任器，则令环之。凡门关无几，送逆及疆。

象胥：掌蛮夷、闽貉、戎狄之国使，掌传王之言而谕说焉，以和亲之。若以时入宾，则协其礼，与其辞，言传之。凡其出入送逆之礼节、币帛、辞令而宾相之。凡国之大丧，诏相国客之礼仪而正其位。凡军旅、会同，受国客币而宾礼之。凡作事：王之大事，诸侯；次事，卿；次事，大夫；次事，（上）士；下事，庶子。

掌客：掌四方宾客之牢礼、饩献、饮食之等数与其政治。主合诸侯而飧礼，则具十有二牢，庶具百物备；诸侯长，十有再献。王巡守、殷国，则国君膳以牲犊，令百官百姓皆具，从者三公视上公之礼，卿视侯伯之礼，大夫视子男之礼，士视诸侯之卿礼，庶子壹视其大夫之礼。

凡诸侯之礼：上公五积，皆视飧牵，三问皆脩。（群介、行人、宰、史皆有牢。）飧五牢，食四十，簠十，豆四十，铏（四）（三）十有二，壶四十，鼎、簠十有二，（牲）（腥）三十有六，皆陈。饔饩九牢，其死牢如飧之陈。牵四牢，米百有二十筥，醯醢百有二十瓮，（车）皆陈。车米视生牢，牢十车，车乘有五簠；车禾视死牢，牢十车，车三秬；色薪倍禾，皆陈。乘禽日九十双，殷膳大牢；以及归，三飧、三食、三燕；若弗酌，则以币致之。凡介、行人、宰、史，皆有飧、饔饩，以其爵等为之牢礼之陈数，唯上介有禽献。

夫人致礼：八壶，八豆，八簋，膳大牢，致飧大牢，食大牢。卿皆见以羔，膳大牢。

侯伯四积，皆视飧牵，再问皆脩。飧四牢，食三十有二，簠八，豆三十有二，铏二十有（八）（四），壶三十有二，鼎、簠十有二腥二十有七，皆陈。饔饩七牢，其死牢如飧之陈。牵三牢，米百筥，醯醢百瓮，皆陈。米三十车，禾四十车，刍薪倍禾，皆陈。

乘禽日七十双，殷膳大牢，三飧、再食、再燕。凡介、行人、宰、史，皆有飧、饔饩，以其爵等为之礼，唯上介有禽献。夫人致礼：八壶，八豆，八簋，膳大牢，致飧大牢。卿皆见以羔，膳特牛。

子男三积，皆视飧牵，壹问以脩。飧三牢，食二十有四，簠六，豆二十有四，铏十有（八）（六），壶二十有四，鼎、簠十有二，（牲）（腥）十有八，皆陈。饔饩五牢，其死牢如飧之陈。牵二牢，米八十筥，醯醢八十瓮，皆陈。米二十车，禾三十车，刍薪倍禾，皆陈。乘禽日五十双，（壹）（再）飧，壹食，壹燕。凡介、行人、宰、史，皆有飧、饔饩，以其爵等为之礼，唯上介有禽献。夫人致礼：六壶，六豆，六簋，膳视致飧。亲见卿，皆膳特牛。

凡诸侯之卿、大夫、士为国客，则如其介之礼以待之。凡礼宾客，国新杀礼，凶荒杀礼，札丧杀礼，祸灾杀礼，在野在外杀礼。凡宾客死，致礼以丧用。宾客有丧，惟刍稍之受。遭主国之丧，不受飧食，受牲礼。

掌讶：掌邦国之等籍，以待宾客。若将有国宾客至，则戒官修委积，与士逆宾于疆，为前驱而入。及宿，则令聚柝。及委，则致积。至于国，宾入馆；次于舍门外，待事于客。及将币，为前驱。至于朝，诏其位，入复；及退，亦如之。凡宾客之治，令讶，讶治之。凡从者出，则使人道之。及归，送亦如之。凡宾客，诸侯有卿讶，卿有大夫讶，大夫有士讶，士皆有讶。凡讶者，宾客至而往，诏相其事，而掌其治令。

掌交：掌以节与币巡邦国之诸侯及其万民之所聚者，道王之德意志虑，使咸知王之好恶，辟行之。使和诸侯之好，达万民之说。掌邦国之通事而结其交好，以谕九税之利、九礼之亲、九牧之维、九禁之难、九戎之威。

掌察：阙。

掌货贿：阙。

朝大夫：掌都家之国治。日朝，以听国事故，以告其君长。

国有政令，则令其朝大夫。凡都家之治于国者，必因其朝大夫，然后听之；唯大事弗因。



凡都家之治有不及者，则诛其朝夫大；在军旅，则诛其有司。

都则：阙。

都士：阙。

家士：阙。

## 冬官考工记第六

国有六职，百工与居一焉。

或坐而论道。或作而行之。或审曲面势，以飭五材，以辨民器。或通四方之珍异以资之。或飭力以长地财。或治丝麻以成之。

坐而论道，谓之王公。作而行之，谓之士大夫。审曲面势，以飭五材，以辨民器，谓之百工。通四方之珍异以资之，谓之商旅。飭力以长地财，谓之农夫。治丝麻以成之，谓之妇功。

粤无镈，燕无函，秦无庐，胡无弓车。粤之无镈也，非无镈也，夫人而能为镈也。燕之无函也，非无函也，夫人而能为函也。秦之无庐也，非无庐也，夫人而能为庐也。胡之无弓车也，非无弓车也，夫人而能为弓车也。

知者创物。巧者述之，守之世，谓之工。百工之事，皆圣人之作也。铄金以为刃，凝土以为器，作车以行陆，作舟以行水，此皆圣人之所作也。

天有时，地有气，材有美，工有巧。合此四者，然后可以为良。材美工巧，然而不良，则不时、不得地气也。橘逾淮而北为枳，秬不逾济，貉逾汶则死，此地气然也。郑之刀，宋之斤，鲁之削，吴粤之剑，迁乎其地而弗能为良，地气然也。燕之角，荆之干，胡之筈，吴粤之金锡，此材之美者也。天有时以生，有时以杀；草木有时以生，有时以死；石有时以泐；水有时以凝，有时以泽：此天时也。

凡攻木之工七，攻金之工六，攻皮之工五，设色之工五，刮摩之工五，（抔）（搏）埴之工二。

攻木之工：轮、舆、弓、庐、匠、车、梓。攻金之工：筑、冶、凫、栗、段、桃。攻皮之工：函、鲍、鞣、韦、裘。设色之工：画、绩、钟、筐、幌。刮摩之工：玉、栴、雕、矢、磬。（抔）（搏）埴之工：陶、旋。

有虞氏上陶，夏后氏上匠，殷人上梓，周人上舆。故一器而工聚焉者，车为多。

车有六等之数：车轡四尺，谓之一等；戈柲六尺有六寸，既建而迤，崇于轡四只，谓之二等；人长八尺，崇于戈四尺，谓之三等。殳长寻有四尺，崇于人四尺，谓之四等。车戟常，崇于殳四尺，谓之五等。酋矛常有四尺，崇于戟四尺，谓之六等。车谓之六等之数。

凡察车之道，必自载于地者始也，是故察车自轮始。凡察车之道，欲其朴属而微至。不朴属，无以为完久也。不微至，无以为戚速也。轮已崇，则人不能登也。轮已庳，则于马终古登阨也。

故兵车之轮六尺有六寸，田车之轮六尺有三寸，乘车之轮六尺有六寸。六尺有六寸之轮，轹崇三尺有三寸也；加轡与輶焉，四尺也；人长八尺，登下以为节。

轮人为轮。

斩三材必以其时。三材既具，巧者和之。轂也者，以为利转也。辐也者，以为直指也。牙也者，以为固抱也。轮敝，三材不失职，谓之完。

望而视其轮，欲其帛尔而下迤也。进而视之，欲其微至也。

无所取之，取诸圜也。

望其辐，欲其靡尔而纤也。进而视之，欲其肉称也。无所取之，取诸易直也。

望其轂，欲其眼也。进而视之，欲其棼之廉也。无所取之，取诸急也。

视其纆，欲其蚤之正也。察其菑蚤不齟，则轮虽敝不匡。

凡斩毂之道，必矩其阴阳。阳也者，稹理而坚。阴也者，疏理而柔。是故以火养其阴，而齐诸其阳，则毂虽敝不𡵓。毂小而长，则柞；大而短，则挚。是故六分其轮崇，以其一为之牙围；参分其牙围而漆其二，椀其漆内而中诎之，以为之毂长，以其长为之围，以其围之防捎其藪；五分其毂之长，去一以为贤，去三以为轵。容毂必直，陈篆必正，施胶必厚，施筋必数，𦨇必负干。既摩，革色青白，谓之毂之善。

参分其毂长，二在外，一在内，以置其辐。凡辐，量其凿深以为幅广。幅广而凿浅，则是以大扞，虽有良工，莫之能固。凿深而辐小，则是固有馀而强不足也。故竝其辐广以为之弱，则虽有重任，毂不折。参分其幅之长而杀其一，则虽有深泥，亦弗之𡵓也。参分其股围，去一以为𦨇围。揉辐必齐，平沉必均。直以指牙，牙得，则无癩而固；不得，则有癩必足见也。

六尺有六寸之轮，𦨇参分寸之二，谓之轮之固。凡为轮，行泽者欲杼，行山者欲倅。杼以行泽，则是刀以割途也，是故途不附。倅以行山，则是搏以行石也，是故轮虽敝，不𦨇于凿。

凡揉牙，外不廉而内不挫、旁不肿，谓之用火之善。是故规之以视其圜也，矩之以视其匡也，县之以视其辐之直也，水之以视其平沉之均也，量其藪以黍，以视其同也，权之以视其轻重之倅也。故可规、可矩、可水、可县、可量、可权也，谓之国工。

轮人为盖，达常围三寸。椳围倍之，六寸。信其椳围以为部广，部广六寸。部长二尺。椳长倍之四尺者二。十分寸之一谓之枚。部尊一枚。弓凿广四枚，凿上二枚，凿下四枚。凿深二寸有半，下直二枚，凿端一枚。弓长六尺谓之庇轵，五尺谓之庇轮，四尺谓之庇轸。参分弓长而揉其一。参分其股围，去一以为蚤围。参分弓长，以其一为之尊。上欲尊而宇欲卑。上尊而宇卑，则吐水疾而霤远。盖已崇则难为门也，盖已卑，是蔽目也，是故盖崇十尺。良盖弗冒弗紃，殷亩而驰，不队，谓之国工。

輿人为车。

轮崇，车广，衡长，参如一，谓之参称。参分车广，去一以为隧。参分其隧，一在前，二在后，以揉其式。以其广之半，为之式崇。以其隧之半，为之较崇。六分其广，以一为之轸围。参分轸围，去一以为式围。参分式围，去一以为较围。参分较围，去一以为轵围。参分轵围，去一以为𦨇围。

圜者中规，方者中矩，立者中县，衡者中水，直者如生焉，继者如附焉。

凡居材，大与小无并。大倚小则摧，引之则绝。

栈车欲弇。饰车欲侈。

𨋖人为𨋖。

𨋖有三度，轴有三理。国马之𨋖，深四尺有七寸。田马之𨋖，深四尺。驂马之𨋖，深三尺有三寸。轴有三理，一者以为𦨇也，二者以为久也，三者以为利也。𨋖前十尺而策半之。

凡任木：任正者，十分其𨋖之长，以其一为之围。衡任者，五分其长，以其一为之围。小于度，谓之无任。五分其轸间，以其一为之轴围。十分其𨋖之长，以其一为之当兔之围。参分其兔围，去一以为颈围。五分其颈围，去一以为踵围。

凡揉𨋖，欲其孙而无弧深。今夫大车之轅挚，其登又难；既克其登，其覆车也必易。此无故，唯轅直且无桡也。是故大车平地既节轩挚之任，及其登阨，不伏其轅，必縊其牛。此无故，唯轅直且无桡也。故登阨者，信任者也，犹能以登；及其下阨也，不援其𨋖，必縊其牛后。此无故，唯轅直且无桡也。

是故𨋖欲顺典。𨋖深则折，浅则负。𨋖注则利准，利准则久，和则安。𨋖欲弧而无折，经而无绝；进则与马谋，退则与人谋；终日驰骋，左不𦨇；行数千里，马不契（需）（𦨇）；终岁御，衣衽不敝。此唯𨋖之和也。劝登马力，马力既竭，𨋖犹能一取焉。

良𨋖环𦨇，自伏兔不至𦨇七寸，𦨇中有𦨇，谓之国𨋖。轸之方也，以象地也。盖之圜也，

以象天也。轮辐三十，以象日月也。

盖弓二十有八，以象星也。龙旂九旂，以象大火也。鸟旂七旂，以象鹑火也。熊旗六旂，以象伐也。龟蛇四旂，以象营室也。弧旌枉矢，以象弧也。

攻金之工，筑氏（执）〔挾〕下齐，冶氏（执）〔挾〕上齐，鳧氏为声，栗氏为量，段氏为铸器，桃氏为刃。

金有六齐。六分其金而锡居一，谓之钟鼎之齐。五分其金而锡居一，谓之斧斤之齐。四分其金而锡居一，谓之戈戟之齐。

参分其金而锡居一，谓之大刃之齐。五分其金而锡居二，谓之削杀矢之齐。金锡半，谓之鉴燧之齐。

筑氏为削。

长尺博寸，合六而成规。欲新而无穷，敝尽而无恶。

冶氏为杀矢。

刃长寸，围寸，铤十之，重三垆。戈广二寸，内倍之，胡三之，援四之。已倨则不入，已句则不决。长内则折前，短内则不疾。是故倨句外博。重三铎。

戟广寸有半寸，内三之，胡四之，援五之。倨句中矩，与刺重三铎。

桃氏为剑。

腊广二寸有半寸，两从半之。以其腊广为之茎围，长倍之。

中其茎，设其后。参分其腊广，去一以为首广而围之。

身長五其茎长，重九铎，谓之上制，上士服之。身長四其茎长，重七铎，谓之中制，中士服之。身長三其茎长，重五铎，谓之下制，下士服之。

鳧氏为钟。

两栳谓之铙，铙间谓之于，于上谓之鼓，鼓上谓之钲，钲上谓之舞，舞上谓之甬，甬上谓之衡。钟县谓之旋，旋虫谓之干。

钟带谓之篆，篆间谓之枚，枚谓之景。于上之攢谓之（隧）〔遂〕。

十分其铙，去二以为钲，以其钲为之铙间，去二以为之鼓间。以其鼓间为之舞修，去二分以为舞广。以其钲之长为之甬长，以其甬长为之围。参分其围，去一以为衡围。参分其甬长，二在上，一在下，以设其旋。

薄厚之所震动，清浊之所由出，侈弇之所由兴，有说。钟已厚则石，已薄则播，侈则柞，弇则郁，长甬则震。是故大钟十分其鼓间，以其一为之厚；小钟十分其钲间，以其一为之厚。钟大而短，则其声疾而短闻；钟小而长，则其声舒而远闻。为遂，六分其厚，以其一为之深而圜之。

栗氏为量。

改煎金锡则不耗，不耗然后权之，权之然后准之，准之然后量之。量之以为龡，深尺，内方尺而圜其外，其实一龡。其臀一寸，其实一豆。其耳三寸，其实一升。重一钧。其声中黄钟之宫。概而不税。

其铭曰：“时文思索，允臻其极。嘉量既成，以观四国。永启厥后，兹器维则。”凡铸金之状：金与锡黑浊之气竭，黄白次之；黄白之气竭，青白次之；青白之气竭，青气次之。然后可铸也。

段氏：阙。

函人为甲。

犀甲七属，兕甲六属，合甲五属。犀甲寿百年，兕甲寿二百年，合甲寿三百年。

凡为甲，必先为容，然后制革。权其上旅与其下旅，而重若一。以其长为之围。

凡甲，锻不挈则不坚，已敝则桡。凡察革之道：视其钻空，欲其窻也；视其里，欲其易也；视其朕，欲其直也；囊之，欲其约也；举而视之，欲其丰也；衣之，欲其无齟也。视其

钻空而窻，则革坚也。视其里而易，则材更也。视其朕而直，则制善也。囊之而约，则周也。举之而丰，则明也。衣之无齟，则变也。

鲍人之事：望而视之，欲其茶白也；进而握之，欲其柔而滑也；（引而信之，欲其直也；）卷而转之，欲其无迤也；视其著，欲其浅也；察其线，欲其藏也。

革欲其茶白，而疾浣之，则坚；欲其柔滑，而腥脂之，则（需）（奕）。（引而信之，欲其直也。）信之而直，则取材正也。信之而枉，则是一方缓、一方急也。若苟一方缓、一方急，则及其用之也，必自其急者先裂；若苟自急者先裂，则是以博为幘也。

卷而转之而不迤，则厚薄序也。视其著而浅，则革信也。察其线而藏，则虽敝不羴。

鞣人为皋陶。

长六尺有六寸，左右端广六寸，中尺，厚三寸。穹者三之一。上三正。

鼓长八尺，鼓四尺，中围加三之一，谓之鼗鼓。为皋鼓，长寻有四尺，鼓四尺，倨句，磬折。凡冒鼓，必以启蛰之日。

良鼓瑕如积环。鼓大而短，则其声疾而短闻。鼓小而长，则其声舒而远闻。

韦氏：阙。

裘氏：阙。

画绩之事：杂五色。东方谓之青，南方谓之赤，西方谓之白，北方谓之黑，天谓之玄，地谓之黄。青与白相次也，赤与黑相次也，玄与黄相次也。

青与赤谓之文，赤与白谓之章，白与黑谓之黼，黑与青谓之黻，五采备谓之绣。

土以黄，其象方，天时变；火以圜；山以章；水以龙；鸟，兽，蛇。

杂四时五色之位以章之，谓之巧。凡画绩之事，后素功。

钟氏染羽。

以朱湛丹秫，三月而烝之，淳而渍之。三入为纁，五入为緌，七入为缁。

筐人：阙。

幌氏：[𠄎+束]丝，以浼水沤其丝，七日，去地尺暴之。昼暴诸日，夜宿诸井，七日七夜，是谓水[𠄎+束]。

[𠄎+束]帛，以栏为灰，渥淳其帛，实诸泽器，淫之以蜃。清其灰而淥之，而挥之；而沃之，而淥之；而涂之，而宿之。明日，沃而淥之。昼暴诸日，夜宿诸井，七日七夜，是谓水[𠄎+束]。

玉人之事：镇圭尺有二寸，天子守之。命圭九寸，谓之桓圭，公守之。命圭七寸，谓之信圭，侯守之。命圭七寸，谓之躬圭，伯守之。天子执冒，四寸，以朝诸侯。天子用全，上公用龙，侯用瓚，伯用将。继子男，执皮帛。

天子圭中必。四圭尺有二寸，以祀天。大圭长三尺，杼上终葵首，天子服之。土圭尺有五寸，以致日，以土地。裸圭尺有二寸，有瓚，以祀庙。琬圭九寸而纁，以象德。琰圭九寸，判规，以除慝，以易行。璧羨度尺，好三寸，以为度。圭璧五寸，以祀日月星辰。

璧琮九寸，诸侯以享天子。

谷圭七寸，天子以聘女。（大璋亦如之，诸侯以聘女。）大璋，中璋九寸，边璋七寸。射四寸，厚寸。黄金勺，青金外，朱中。鼻寸，衡四寸。有纁。天子以巡守，宗祝以前马。

（大璋亦如之，诸侯以聘女。）瑑圭璋八寸，璧琮八寸，以覲、聘。

牙璋、中璋七寸，射二寸，厚寸，以起军旅，以治兵守。

狙琮五寸，宗后以为权。大琮十有二寸，射四寸，厚寸，是谓内镇，宗后守之。

狙琮七寸，鼻寸有半寸，天子以为权。两圭五寸，有邸，以祀地，以旅四望。

瑑琮八寸，诸侯以享夫人。案十有二寸，枣、栗十有二列，诸侯纯九，大夫纯五，夫人以劳诸侯。

璋邸射，素功；以祀山川，以致稍餼。

栲人：阙。

雕人：阙。

磬氏为磬。

倨句一矩有半。其博为一，股为二，鼓为三。参分其股博。

去一以为鼓博。参分其鼓博，以其一为之厚。已上则摩其旁，已下则摩其端。

矢人为矢。

鍬矢参分，箚矢参分，一在前，二在后。兵矢、田矢五分，二在前，三在后。杀矢七分，三在前，四在后。

参分其长而杀其一，五分其长而羽其一，以其筭厚为之羽深。水之，以辨其阴阳。夹其阴阳以设其比，夹其比以设其羽，参分其羽以设其刃，则虽有疾风，亦弗之能惮矣。刃长寸、围寸，铤十之，重三垆。

前弱则俯，后弱则翔；中弱则紆，中强则扬；羽丰则迟，羽杀则躁。是故夹而摇之，以视其丰杀之节也；桡之，以视其鸿杀之称也。

凡相筭，欲生而抟；同抟，欲重；同重，节欲疏；同疏，欲栗。

陶人为甗，实二鬴，厚半寸，唇寸。盆，实二鬴，厚半寸，唇寸。甑，实二鬴，厚半寸，唇寸，七穿。鬲，实五鬴，厚半寸，唇寸。

庾，实二鬴，厚半寸，唇寸。

旅人为簋，实一鬴，崇尺，厚半寸，唇寸。豆，实三而成鬴，崇尺。

凡陶旅之事：髻罍辟暴不入市，器中脰，豆中县。脰崇四尺，方四寸。

梓人为筍簞。

天下之大兽五：脂者，膏者，裸者，羽者，鳞者。宗庙之事，脂者、膏者以为牲，裸者、羽者、鳞者以为筍簞。

外骨、内骨，却行、仄行，连行、紆行，以脰鸣者，以注鸣者，以旁鸣者，以翼鸣者，以股鸣者，以胸鸣者，谓之小虫之属，以为雕琢。

厚唇，弇口；出目，短耳；大胸，燿后；大体，短脰：若是者谓之裸属，恒有力而不能走，其声大而宏。有力而不能走，则于任重宜；大声而宏，则于钟宜。若是者以为钟簞，是故击其所县而由其簞鸣。

锐喙，决吻；数目，顚脰；小体，蹇腹：若是者谓之羽属，恒无力而轻，其声清阳而远闻。无力而轻，则于任轻宜；其声清阳而远闻，〔则〕于磬宜。若是者以为磬簞，故击其所县而由其簞鸣。

小首而长，转身而鸿，若是者谓之鳞属，以为筍。

凡攫杀、援噬之类，必深其爪，出其目，作其鳞之而。深其爪，出其目，作其鳞之而，则于视必拨尔而怒。苟拨尔而怒，则于任重宜，且其匪色必似鸣矣。爪不深，目不出，鳞之而不作，则必颓尔如委矣。苟颓尔如委，则加任焉，则必如将废措，其匪色必似不鸣矣。

梓人为饮器。勺一升，爵一升，觚三升。献以爵而酬以（觚）（觶）。一献而三酬，则一豆矣。食一豆肉，饮一豆酒，中人之食也。凡试梓，饮器乡衡而实不尽，梓师罪之。

梓人为侯。广与崇方，参分其广，而鹄居一焉。上两个与其身三，下两个半之。上纲与下纲出舌寻，緝寸焉。

张皮侯而栖鹄，则春以功。张五采之侯，则远国属。张兽侯，则王以息燕。

祭侯之礼，以酒、脯、醢。其辞曰：“惟若宁侯。毋或若女不宁侯，不属于王所，故抗而射女。强饮强食，诒女曾孙诸侯百福。”庐人为庐器。

戈柲六尺有六寸。殳长寻有四尺。车载常。酋矛常有四尺，夷矛三寻。

凡兵无过三其身，过三其身，弗能用也；而无已，又以害人。故攻国之兵欲短，守国之兵欲长。攻国之人众，行地远，食饮饥，且涉山林之阻，是故兵欲短。守国之人寡，食饮饱，

行地不远，且不涉山林之阻，是故兵欲长。

凡兵，句兵欲无弹，刺兵欲无蛄。是故句兵稊，刺兵抟。

击兵同强，举围欲细，细则校。刺兵同强，举围欲重，重欲傅人；傅人则密，是故侵之。

凡为爰，五分其长，以其一为之被而围之。参分其围，去一以为晋围。五分其晋围，去一以为首围。凡为酋矛，参分其长，二在前、一在后而围之。五分其围，去一以为晋围。参分其晋围，去一以为刺围。

凡试庐事：置而摇之，以视其蛄也；灸诸墙，以视其桡之均也；横而摇之，以视其劲也。六建既备，车不反覆，谓之国工。

匠人建国，水地以县。置臬以县，视以景。为规，识日出之景与日入之景。昼参诸日中之景，夜考之极星，以正朝夕。

匠人营国。方九里，旁三门。国中九经、九纬，经涂九轨。

左祖右社，面朝后市。市朝一夫。

夏后氏世室，堂修二七，广四修一。五室，三四步，四三尺。

九阶。四旁两夹，窗白盛。门堂，三之二；室，三之一。

殷人重屋，堂修七寻，堂崇三尺，四阿，重屋。

周人明堂，度九尺之筵，东西九筵，南北七筵，堂崇一筵。

五室，凡室二筵。室中度以几，堂上度以筵，宫中度以寻，野度以步，涂度以轨。庙门容大扃七个，闾门容小扃参个，路门不容乘车之五个，应门二彻参个。内有九室，九嫔居之。外有九室，九卿朝焉。九分其国以为九分，九卿治之。王宫门阿之制五雉，宫隅之制七雉，城隅之制九雉。经涂九轨，环涂七轨，野涂五轨。门阿之制，以为都城之制。宫隅之制，以为诸侯之城制。环涂以为诸侯经涂，野涂以为都经涂。

匠人为沟洫。

耜广五寸。二耜为耦。一耦之伐，广尺深尺谓之畎。田首倍之，广二尺、深二尺谓之遂。

九夫为井。井间广四尺、深四尺，谓之沟。方十里为成。成间广八尺、深八尺，谓之洫。方百里为同。同间广二寻、深二仞，谓之浍。专达于川，各载其名。

凡天下之地势，两山之间必有川焉，大川之上必有涂焉。

凡沟逆地趾，谓之不行；水属不理孙，谓之不行。稍沟三十里而广倍。凡行奠水，磬折以参伍。欲为渊，则句于矩。

凡沟必因水势，防必因地势，善沟者水漱之，善防者水淫之。凡为防，广与崇方，其杀参分去一。大防外杀。凡沟防，必一日先深之以为式，里为式然后可以傅众力。

凡任，索约大汲其版，谓之无任。葺屋参分，瓦屋四分。困窖仓城，逆墙六分。堂涂十有二分。窰，其崇三尺。墙厚三尺，崇三之。

车人之事：半矩谓之宣，一宣有半谓之欂，一欂有半谓之柯，一柯有半谓之磬折。

车人为末，疵长尺有一寸，中直者三尺有三寸，上句者二尺有二寸。自其庇缘其外，以至于首，以弦其内，六尺有六寸，与步相中也。坚地欲直庇，柔地欲句庇。直庇则利推，句庇则利发。倨句磬折，谓之中地。

车人为车，柯长三尺，博三寸，厚一寸有半。五分其长，以其一为之首。毂长半柯，其围一柯有半。辐长一柯有半，其博三寸，厚三之一。渠三柯者三。——行泽者欲短毂，行山者欲长毂；短毂则利，长毂则安。行泽者反輶，行山者仄輶；反輶则易，仄輶则完。——六分其轮崇，以其一为之牙围。

柏车毂长一柯，其围二柯，其辐一柯，其渠二柯者三。五分其轮崇，以其一为之牙围。

大车崇三柯，纁寸，牝服二柯有参分柯之二。羊车二柯有参分柯之一。柏车二柯。

凡为輶，三其轮崇。参分其长，二在前，一在后，以凿其钩。

彻广（六）〔八〕尺。鬲长六尺。

弓人为弓。

取六材必以其时。六材既聚，巧者和之。

干也者，以为远也。角也者，以为疾也。筋也者，以为深也。

胶也者，以为和也。丝也者，以为固也。漆也者，以为受霜露也。

凡取干之道七：柘为上，櫟次之，栗桑次之，橘次之，木瓜次之，荆次之，竹为下。凡相干，欲赤黑而阳声，赤黑则乡心，阳声则远根。凡析干，射远者用势，射深者用直。居干之道，菑栗不迤，则弓不发。

凡相角，秋弑者厚，春弑者薄；稚牛之角直而泽，老牛之角紾而昔；疾疾，险中；瘠牛之角无泽。角欲青白而丰末。

夫角之本，蹇于脑而休于气，是故柔；柔故欲其势也。白也者，势之征也。夫角之中，恒当弓之畏；畏也者，必桡，桡故欲其坚也。青也者，坚之征也。夫角之末，远于脑而不休于气，是故脆；脆故欲其柔也。丰末也者，柔之征也。角长二尺有五寸，三色不失理，谓之牛戴牛。

凡相胶，欲朱色而昔。——昔也者，深瑕而泽，紾而转廉。——鹿胶青白，马胶赤白，牛胶火赤，鼠胶黑，鱼胶饵，犀胶黄。凡昵之类不能方。

凡相筋，欲小简而长，大结而泽。小简而长，大结而泽，则其为兽必剽；以为弓，则岂异于其兽？筋欲敝之敝。

漆欲测，丝欲沉。

得此六材之全，然后可以为良。

凡为弓，冬析干而春液角，夏治筋，秋合三材，寒奠体，冰析灋。冬析干则易，春液角则合，夏治筋则不烦，秋合三材则合，寒奠体则张不流，冰析灋则审环，春被弦则一年之事。

析干必伦。析角无邪。斫目必荼。斫目不荼，则及其大修也，筋代之受病。夫目也者必强，强者在内而摩其筋，夫筋之所由檐恒由此作。故角三液而干再液，厚其帛则木坚，薄其帛则（需）〔奕〕，是故厚其液而节其帛。约之不皆约，疏数必侔。斫挚必中，胶之必均。斫挚不中，胶之不均，则及其大修也，角代之受病。夫怀胶于内而摩其角，夫角之所由挫恒由此作。

凡居角，长者以次（需）〔奕〕。恒角而短，是谓逆桡。引之则纵，释之则不校。恒角而达，辟如终继，非弓之利也。今夫菱解中有变焉，故校；于挺臂中有柎焉，故剽。恒角而达，引如终继，非弓之利〔也〕。

拊干欲孰于火而无羸，拊角欲孰于火而无燂，引筋欲尽而无伤其力，煮胶欲孰而水火相得，然则居旱亦不动，居湿亦不动。苟有贱工，必因角干之湿以为之柔，善者在外，动者在内；虽善于外，必动于内，虽善亦弗可以为良矣。

凡为弓：方其峻而高其柎，长其畏而薄其敝；宛之无已，应。下柎之弓，末应将兴。为柎而发，必动于弑。弓而羽弑，末应将发。

弓有六材焉，维干强之，张如流水。维体防之，引之中参。

维角劳之，欲宛而无负弦。引之如环，释之无失体，如环。

材美，工巧，为之时，谓之参均。角不胜干，干不胜筋，谓之参均。量其力有三均，均者三，谓之九和。九和之弓，角与干权，筋三侔，胶三錡，丝三邸，漆三𧈧。上工以有馀，下工以不足。

为天子之弓，合九而成规。为诸侯之弓，合七而成规。大夫之弓，合五而成规。士之弓，合三而成规。

弓长六尺有六寸，谓之上制，上士服之。弓长六尺有三寸，谓之中制，中士服之。弓长六尺，谓之下制，下士服之。

凡为弓，各因其君之躬志虑血气。丰肉而短，宽缓以荼，若是者为之危弓，危弓为之安

矢。骨直以立，忿势以奔，若是者为之安弓，安弓为之危矢。其人安，其弓安，其矢安，则莫能以速中，且不深。其人危，其弓危，其矢危，则莫能以愿中。

往体多，来体寡，谓之夹臾之属，利射侯与弋。往体寡，来体多，谓之王弓之属，利射革与质。往体、来体若一，谓之唐弓之属，利射深。

大和无灂，其次筋角皆有灂而深，其次有灂而疏，其次角无灂。合灂若背手文。角环灂，牛筋賁灂，麋筋斥蠖灂。

和弓击摩。覆之而角至，谓之句弓。覆之而干至，谓之侯弓。覆之而筋至，谓之深弓。